



PERCUMA 21 - 27 Mac 2019, 13 - 19 Rejab 1440

Tutup sekolah swasta  
tahfiz tidak berdaftar

MUKA 3

57,710 Rumah  
Selangorku diluluskan

MUKA 5

Ekonomi Malaysia  
dijangka terus stabil

MUKA 7

Polis dimaki kes  
serangan masjid

MUKA 10

OLEH NAZLI IBRAHIM & AFIX REDZUAN

**SHAH ALAM** - Nilai pelaburan di Selangor merekodkan sejarah baharu apabila berjaya mencatatkan pencapaian tertinggi dalam sejarah dengan peningkatan sebanyak 238 peratus berbanding tahun sebelumnya.

Duli Yang Maha Mulia Sultan Selangor, Sultan Sharafuddin Idris Shah bertitah, nilai pelaburan luar biasa yang dicatatkan pada 2018 berjumlah RM18.947 bilion berbanding 2017 berjumlah RM5.592 bilion.

"Dengan kedudukan strategik dan tersedia prasarana yang baik, Selangor sentiasa menjadi pilihan pelabur domestik dan luar negara yang datang untuk menjalankan perniagaan mereka di negeri ini walaupun keadaan ekonomi global pada 2019 diramalkan suram selain angka pertumbuhan ekonomi dunia dijangka akan merosot kepada 3.5 peratus kepada 3.7 peratus, pada 2018.

"Beta dimaklumkan bahawa 241 projek perkilangan sudah diluluskan di Selangor bagi sepanjang tahun 2018 iaitu yang tertinggi di dalam negara, berbanding 202 projek, pada 2017," titah baginda.

Baginda bertitah demikian ketika menyampaikan titah ucapan di Istiadat Pembukaan Persidangan Penggal Kedua, Dewan Negeri Selangor ke-14 Tahun 2019, di sini, pada 18 Mac lalu.

Sultan Sharafuddin bertitah, projek pengilangan yang diluluskan itu berjaya mewujudkan 9,196 peluang pekerjaan kepada rakyat Selangor.

Baginda bertitah, pencapaian itu jelas mencerminkan Selangor sebagai nadi utama pembangunan ekonomi negara.

Sementara itu, Dato' Menteri Besar, Amirudin Shari, mengumumkan Selangor menempa sejarah baharu apabila merekodkan nilai pelaburan tertinggi sejak 30 tahun lalu berjumlah RM24.8 bilion bagi 2018 menerusi sektor perkilangan dan perkhidmatan.

Katanya, jumlah nilai pelaburan dilu-

# Pelaburan tertinggi dalam sejarah



luskan bagi sektor perkilangan berjumlah RM18.947 bilion, peningkatan 238 peratus berbanding RM5.529 bilion, pada 2017.

Beliau berkata, sektor perkhidmatan pula menyaksikan Selangor cemerlang merekodkan jumlah pelaburan tertinggi di Malaysia sebanyak RM5.784 bilion berbanding RM4.5 bilion, pada 2017.

"Daripada statistik Lembaga Pembangunan Pelaburan Malaysia (MIDA) 2018,

sebanyak 241 projek perkilangan diluluskan bagi tahun lalu berbanding 202 projek, pada 2017.

"Jumlah projek diluluskan ini adalah tertinggi bagi tahun lalu berbanding negeri lain dengan peningkatan sebanyak 19 peratus daripada segi bilangan projek.

"Produk berasaskan logam menjadi penyumbang terbesar bagi sektor industri dengan RM6.892 bilion diikuti kertas,

percetakan dan penerbitan (RM5.1 bilion), produk berasaskan getah (RM1.29 bilion), pengilangan makanan (RM835 juta) serta produk plastik," katanya dalam sidang media khas di Lobi Bangunan Annex, Dewan Negeri Selangor (DNS).

Sebelum ini, Selangor pernah mencatatkan jumlah nilai pelaburan sektor perkilangan tertinggi sekitar RM11 bilion, pada 2011.

SEJENIS PENYAKIT YANG TIDAK RASA SAKIT, HANYA SIMPTON  
**BENGKAK PROSTAT**  
ANCAMAN KEPADA LELAKI

Kencing Tidak Lawas  
Sukar Kencing  
Kencing Terhenti-henti  
Kencing Berdarah  
Sukar Menahan Kencing  
Sakit Dan Lengguh Bahagian Bawah Pinggang  
Prestasi Tenaga Lelaki Menurun Drastik  
Gangguan Pembuangan Air Besar  
Kencing Kerap Pada Waktu Malam



Laman Web Rasmi : [www.mostyherbs.com](http://www.mostyherbs.com)  
MOSTY HERBS

6 Tahun Gagah Di Pasaran  
Versi Tempatan →  
(Versi Eksport)

PROMOSI  
STOKIS & AGEN  
40% / 30%

Prosticare  
Stimulating Prostate Health

Manan  
Ergonomik Keseimbangan Kesehatan

HANYA RM 84

HQ & PUSAT PENGEDARAN  
38A, Jalan 1/2, Taman Sri Gombak,  
68100 Batu Caves, Selangor.  
Tel : 019 - 200 2275  
Whatsapp : 0112 - 910 2345

STOKIS KAMI :  
Sungai Besar - En. Zul 019 567 5795  
Bangi - Prof Zaki 013 306 1934  
Shah Alam - Usrah Mart 016 906 0099

PENGEDARAN LEMBAH KLANG  
Rangkaian FARMASI ALPHA

ALPHA



## FDI negeri meningkat 400.7 peratus

**SHAH ALAM** - Peningkatan sebanyak 400.7 peratus pelaburan langsung asing (FDI) di Selangor pada tahun 2018 berbanding tahun sebelumnya mencerminkan keyakinan pelabur terhadap ekonomi negeri termaju itu.

Duli Yang Maha Mulia Sultan Selangor, Sultan Sharafuddin Idris Shah bertitah, pada tahun 2018 Selangor menerima RM10.837 bilion pelaburan langsung asing, berbanding tahun sebelumnya sebanyak RM2.164 bilion.

"Pencapaian yang sangat memberangsangkan ini juga turut diterjemahkan menerusi keyakinan yang ditunjukkan pelabur asing apabila FDI menunjukkan peningkatan sebanyak 400.7 peratus, berbanding tahun sebelumnya.

"Ini menunjukkan tahap keyakinan yang tinggi oleh pelabur terhadap Kerajaan Neg-

eri dan rakyat Selangor," titah baginda.

Baginda bertitah demikian ketika menyampaikan titah ucapan di Istiadat Pembukaan Persidangan Penggal Kedua, Dewan Negeri Selangor ke-14 Tahun 2019, di sini, pada 18 Mac lalu.

Baginda turut berkenan dengan usaha Invest Selangor mewujudkan Selangor Talent Portal Application.

Titah baginda, aplikasi itu dapat dijadikan sebagai landasan dan rujukan kepada pelabur untuk mendapatkan sumber tenaga kerja mahir bersesuaian dengan kehendak syarikat.

Selain itu, aplikasi terbabit juga menjadi landasan kepada graduan yang baru menamatkan pengajian untuk mendapatkan pekerjaan bersesuaian dengan kelulusan dan kemahiran dimiliki.

## China kekal pelabur asing tertinggi

**SHAH ALAM** - Di sebalik kejayaan Selangor merekodkan nilai pelaburan tertinggi sejak 30 tahun lalu dengan berjumlah RM24.8 bilion bagi tahun lalu menerusi sektor perkilangan dan perkhidmatan, China adalah penyumbang tertinggi sebagai pelabur asing.

Dato' Menteri Besar, Amirudin Shari berkata, China terus menjadi penyumbang tertinggi sebanyak RM3.934 bilion menerusi sektor barang asas logam, produk kertas dan sektor lain.

"Jepun pula menjadi penyumbang tertinggi dari segi bilangan projek dengan 27 projek diluluskan tahun lalu berjumlah RM435.6 juta.

"Jumlah itu menerusi pembabitan bidaan seperti industri semikonduktor, *factory automation parts*, industri makanan, produk LED serta makanan," katanya dalam sidang media khas di Lobi Bangunan Annex, Dewan Negeri Selangor (DNS).

Bagi tahun lalu, Selangor mencatatkan jumlah nilai pelaburan diluluskan bagi sektor perkilangan berjumlah RM18.947 bilion manakala RM5.784 bilion menerusi sektor perkhidmatan.

Amirudin menjelaskan, pelaburan baru juga mencatatkan peningkatan 427 peratus iaitu RM13.522 bilion pada tahun lalu berbanding RM2.565 bilion pada 2017.

Pengembangan pelaburan pula mempamerkan peningkatan 79.2 peratus berbanding tahun sebelumnya iaitu RM5.424 bilion pada tahun lalu dan RM3.026 bilion direkodkan, pada 2017.

"Secara keseluruhannya, 18,475 berpeluang pekerjaan direkodkan dan yang tertinggi di negara dalam sektor perkilangan, pada tahun lalu.

"Ia adalah peningkatan 84 peratus berbanding 10,031 peluang pekerjaan di sektor perkilangan, pada 2017," katanya.

Sultan Sharafuddin berkenan

# Selangor kekal destinasi pelaburan

OLEH NAZLI IBRAHIM

**SHAH ALAM** - Duli Yang Maha Mulia Sultan Selangor, Sultan Sharafuddin Idris Shah, berkenan apabila Selangor terus menjadi pilihan destinasi pelaburan oleh syarikat terkemuka dunia.

Baginda bertitah, antaranya kilang Sony EMCS di Bangi iaitu antara kilang pengeluar TV LED Sony terbesar di dunia dan menjadi satu-satunya pusat kajian serta pembangunan bagi produk TV Sony, di luar Jepun.

"Manakala, syarikat IKEA dari Sweden pula sedang membangunkan pusat pengedaran serantau ketiga terbesar di dunia yang terletak, di Pulau Indah

**SULTAN SHARAFUDDIN IDRIS SHAH**

di sini, pada 18 Mac lalu.

Baginda bertitah, syarikat Hartalega sebagai pengeluar sarung tangan nitrile terbesar di dunia dengan keupayaan mengeluarkan lebih 30 bilion sarung tangan setahun turut dibuka, di Sepang.

Sultan Sharafuddin turut menzahirkan keyakinan Kerajaan Negeri melalui Invest Selangor dengan kerjasama MIDA dan MATRADE dapat mempertingkatkan lagi inisiatif membawa masuk pelaburan besar ke negeri itu.



## Selangor rekod peningkatan RM4.52 billion

**SHAH ALAM** - Selangor merekodkan jumlah pelaburan tempatan bernilai RM4.52 billion daripada jumlah keseluruhan RM7.8 billion, pada tahun 2016.

EXCO Pelaburan, Perindustrian dan Perdagangan, Industri Kecil dan Sederhana, Dato'Teng Chang Kim berkata, jumlah itu direkodkan menerusi 242 projek perkilangan yang diluluskan, pada 2016.

"Daripada jumlah itu, RM3.35 billion pelaburan daripada pelabur luar dan lebih 16,000 peluang pekerjaan berjaya diwujudkan," katanya.

Beliau berkata demikian ketika menjawab pertanyaan mulut dikemukakan Ahli Dewan Negeri Hulu Bernam, Datuk Rosni Sohar berhubung pelaburan tempatan, pada Sidang Dewan Negeri Selangor, pada 20 Mac lalu.

Antara bidang tumpuan pelaburan adalah elektrik dan elektronik, peralatan dan pengangkutan, sains hayat, makanan dan minuman serta mesin dan peralatan.

Chang Kim berkata, daripada bidang berkaitan, Kerajaan Negeri memberikan tumpuan kepada empat industri iaitu e-dagang, bioteknologi, aeroangkasa dan hab halal.

# Kerajaan Negeri bakal ambil tindakan

**SHAH ALAM** - Kerajaan Negeri mengambil perhatian titah Duli Yang Maha Mulia Sultan Selangor, Sultan Sharafuddin Idris Shah, yang mengarahkan semua sekolah swasta tahfiz yang tidak berdaftar dengan Jabatan Agama Islam (JAIS) ditutup dan ditamatkan perkhidmatan.

Dato' Menteri Besar, Amirudin Shari berkata, Kerajaan Negeri sudah menjalankan operasi pendafiran sekolah tahfiz swasta sejak dua tahun lalu ketika di bawah pentadbiran Dato' Seri Mohamed Azmin Ali dengan kerjasama JAIS serta Persatuan Institusi Tahfiz Al-Quran Negeri Selangor (PITAS).

"Kita belum mengambil tindakan menutup sebab dua tahun kebelakangan ini saya bersama Dato' Seri Mohamad Azmin ketika menjadi Dato' Menteri Besar sudah mengarahkan semua sekolah tahfiz untuk mendaftar. Kita bekerjasama dengan PITAS serta JAIS untuk mendaftarkan operasi mereka.

"Kerajaan Negeri turut menjadi pemudahcara untuk pengusaha sekolah tahfiz mendaftarkan bangunan supaya mempunyai aspek keselamatan terutama apabila berlaku kecemasan ketika kebakaran supaya mereka memenuhi kemudahan ditetapkan. Sekarang, kita sudah daftarkan lebih 200 sekolah tahfiz dan bakinya tidak banyak," katanya.

Beliau berkata demikian kepada media ketika ditemui selepas selesai Istiadat Pembukaan Persidangan Penggal Kedua Dewan Negeri Selangor (DNS) Kali ke-14 Tahun 2019, pada 18 Mac lalu.

Katanya, hanya sedikit seko-

**Kerajaan Negeri turut menjadi pemudahcara untuk pengusaha sekolah tahfiz mendaftarkan bangunan supaya mempunyai aspek keselamatan terutama apabila berlaku kecemasan ketika kebakaran supaya mereka memenuhi kemudahan ditetapkan**

**AMIRUDIN SHARI**  
Dato' Menteri Besar

lah tahfiz yang belum berdaftar kerana tidak mampu memenuhi kriteria ditetapkan, namun mereka masih mempunyai peluang terakhir untuk melengkapannya.

"Kita akan ambil tindakan seperti titah tuanku serta memberikan peluang terakhir satu atau dua bulan kepada mereka untuk melengkapkan kriteria sebelum mengambil tindakan sewajarnya.

"Isunya bukan kita nak halang (operasi). Kita nak pastikan mereka mempunyai ko-kurikulum sempurna selain kemudahan yang tidak membahayakan kerana sebelum ini berlakunya kejadian kebakaran dan tanah runtuh disebabkan ketiadaan kemudahan lengkap," katanya.



**Titah Sultan Sharafuddin**

# Tutup sekolah swasta tahfiz tidak berdaftar

OLEH AFIX REDZUAN

**SHAH ALAM** - Duli Yang Maha Mulia Sultan Selangor, Sultan Sharafuddin Idris Shah, mengarahkan semua sekolah swasta tahfiz yang tidak berdaftar dengan JAIS ditutup dan ditamatkan perkhidmatan.

Baginda bertitah, tindakan sama juga perlu diambil terha-

dap sekolah swasta tahfiz yang tidak mempunyai ko-kurikulum dan sistem pendidikan moden.

"Pendidikan tahfiz di Selangor sudah menarik minat ramai ibu bapa dan pelajar.

"Beta menitahkan sekolah swasta tahfiz yang tidak berdaftar dengan JAIS dan tidak mempunyai ko-kurikulum serta sistem pendidikan akademik moden ditutup juga ditan-

matkan perkhidmatannya," titah baginda.

Baginda bertitah demikian sempena pembukaan Persidangan Penggal Kedua Dewan Negeri Selangor (DNS) Kali ke-14 Tahun 2019, di Bangunan Annex, di sini, pada 18 Mac lalu.

Secara keseluruhan terdapat 15,000 pelajar tahfiz di 263 sekolah swasta tahfiz yang berdaftar dengan JAIS.

# Penguatkuasaan lebih ketat kepada pesalah

**SHAH ALAM** - Duli Yang Maha Mulia Sultan Selangor, Sultan Sharafuddin Idris Shah, menyatakan Kerajaan Negeri melaksanakan penguatkuasaan serius terhadap pihak yang melepaskan sisa buangan ke sungai.

Baginda bertitah, undang-undang lebih tegas harus dibuat jika perlu kepada pesalah yang mencemarkan sungai, di Selangor.

"Beta dimaklumkan bahawa empat atau lima sungai di Selangor tercemar dengan bahan buangan daripada sisa pepejal dan sisa toksik.

"Beta menyeru Kerajaan Negeri supaya melaksanakan penguatkuasaan yang lebih serius terhadap pesalah. Jika perlu, undang-undang yang lebih berat harus dibuat kepada pesalah yang mencemarkan sungai, di Selangor," titah baginda.

Selangor dikejutkan dengan

insiden pencemaran sisa industri, di Taman Eng Ann, Klang, apabila 21 bahan industri ditemui dalam laporan awal kajian makmal yang dilakukan terhadap sampel pencemaran, di lokasi pencemaran, pada 14 Mac lalu.

Sementara itu, EXCO Alam Sekitar, Teknologi Hijau, Sains, Teknologi dan Inovasi dan Hal Ehwal Pengguna, Hee Loy Sian menegaskan, kerja pembersihan sisa industri di kolam takungan, saliran longkang dan tanah tercemar di Taman Eng Ann siap sepenuhnya dalam tempoh tiga hari, pada 17 Mac lalu.

Katanya, sebanyak 28,000 liter sisa disedut menggunakan dua lori 'vacuum suction tank' berkapasiti 8,000 liter dan 12 tangki simpanan berkapasiti 1,000 liter, setiap satu.

"Semua sisa itu dipenuhi dan disimpan sebelum di-

lupuskan. Kaedah pelupusan bersesuaian dilakukan selepas mendapat keputusan analisa pensampelan daripada Jabatan Kimia Malaysia berkenaan jenis buangan terbabit.

"Hasil pemantauan laluan daripada longkang berdekatan kolam sehingga kunci air Bukit Naga mendapat tiada sisa lain yang dikesan," katanya dalam keadaan.

Pada 19 Mac lalu, seorang pemandu lori tangki direman selama dua hari bagi membantu siasatan berhubung kes pembuangan sisa industri itu.

Perintah berkenaan dikeluarkan Majistret Roslizi Sulaiman selepas membenarkan permohonan yang dikemukakan oleh polis yang menyiasat kes itu mengikut Seksyen 277 Kanun Keseksaan.

Ketua Polis Daerah Klang Utara, Asisten Komisioner Nurulhuda



Mohd Salleh dalam kenyataan berkata, seorang lelaki berusia 26 tahun ditahan di sebuah rumah di Jeram, Kuala Selangor, pada jam

4.30 petang dan polis turut merampas sebuah lori tangki yang dipercaya digunakan untuk membawa sisa industri berkenaan.



Tawar rawatan perubatan berpatutan

# Lima hospital bantu B40, M40

OLEH NADIAH ZAMLUIS

**SHAH ALAM** - Pembinaan lima hospital swasta oleh Kerajaan Negeri dijangka mampu membantu golongan B40 dan M40 mendapatkan rawatan perubatan dengan lebih cepat serta pada harga lebih berpatutan.

EXCO Kesihatan, Kebajikan, Pemberdayaan Wanita dan Keluarga, Dr Siti Mariah Mahmud berkata, ia kerana Kerajaan Negeri sentiasa prihatin terhadap permasalahan penduduk yang terpaksa berdepan dengan kos rawatan agak tinggi di hospital swasta sementara terpaksa menunggu lama, di hospital atau klinik kerajaan.

"Kami jangkakan, melalui lima hospital yang bakal dibina Kerajaan Negeri melalui anak syarikat milik penuh Perbadanan Pembangunan Negeri Selangor (PKNS), Selgate Corporation, ia mampu menyelesaikan permasalahan berkenaan.

"Rakyat negeri ini boleh menggunakan Skim Peduli Sihat dan juga Bantuan Sihat Selangor ketika berkunjung ke hospital swasta berkenan.

"Apabila adanya hospital ini, Selangor akan menjadi negeri pertama yang membolehkan pen-

**Dengan hospital Selgate yang ada, kami berharap ia dapat menyediakan perkhidmatan kepada golongan berpendapatan pertengahan dan rendah**

**DR SITI MARIAH**

EXCO Kesihatan, Kebajikan, Pemberdayaan Wanita dan Keluarga

duduknya memilih rawatan perubatan terbaik melalui khidmat rawatan daripada tahap percuma, sederhana dan mahal mengikut tahap kemampuan mereka," katanya kepada SelangorKini ketika Sidang Dewan Negeri Selangor (DNS), di sini, pada 19 Mac lalu.

Kerajaan Negeri mengumumkan lima hospital Selgate akan dibina termasuk di Rawang, sementara empat lokasi lain ialah Kota Damansara, Shah Alam, Gombak dan Kuala Selangor.

Dr Mariah berkata, Hospital Selgate Rawang akan dibuka pada suku tahun pertama 2020, manakala empat yang lain akan

dibuka secara berperingkat, menjelang 2023.

Katanya, hospital berkenaan bakal dilengkapi jabatan perubatan seperti Pusat Obstetrik, Pusat Genekologi, Pusat Gediatrik, Pusat Ortopedik, Pusat Kardiologi, Klinik Am dan Pusat Pembedahan Am.

"Selangor mempunyai banyak hospital swasta tetapi kosnya agak tinggi menyebabkan mereka dari

pada kumpulan B40 memilih institusi kerajaan.

"Dengan hospital Selgate yang ada, kami berharap ia dapat menyediakan perkhidmatan kepada golongan berpendapatan pertengahan dan rendah. Jadi, mereka akan mempunyai alternatif kepada hospital kerajaan," katanya.

Berdasarkan statistik, jumlah lawatan pesakit ke klinik kesihatan kerajaan di Selangor antara

dan 2018 meningkat sebanyak 1.45 juta pesakit iaitu 4.19 juta pada 2014 kemudiannya 5.64 juta, pada 2018.

Sementara lima klinik kesihatan di negeri itu menerima pelawat melebihi 200,000 pada tahun lalu ialah Klinik Kesihatan Kajang, Klinik Kesihatan Ampang, Klinik Kesihatan Sungai Buloh, Klinik Kesihatan Selayang Baru dan Klinik Kesihatan Bandar Botanik.



## Federalisme kukuh kerjasama pusat dan negeri

**SHAH ALAM** - Kerjasama kukuh antara negeri dan persekutuan mendapat perkenan Duli Yang Maha Mulia Sultan Selangor, Sultan Sharafuddin Idris Shah.

Baginda turut menzahirkan ucapan terima kasih kepada Kerajaan Persekutuan yang memperuntukkan sejumlah RM2.6 bilion bagi melaksanakan 39 projek baru dan 274 projek sambungan dalam Rolling Plan 4 (RP4).

"Prinsip federalisme yang sihat dan matang akan dapat menjana pertumbuhan ekonomi dan memakmurkan negeri.

"Beta menyambut baik usaha Kerajaan Pusat menggalas dasar yang berteraskan pertumbuhan dan perkongsian kemakmuran.

"Dasar ini akan membangkitkan semangat kerjasama bagi berkongsi kekayaan berkonsepkan *shared prosperity*," titah ba-

ginda pada Istiadat Pembukaan Persidangan Penggal Kedua, Dewan Negeri Selangor ke-14 Tahun 2019, pada 18 Mac lalu.

Pada masa sama, baginda turut berkenan usaha gigih Kementerian Hal Ehwal Ekonomi untuk memuktamadkan segera pelaksanaan Projek Menaiktaraf Jambatan Klang Ketiga Fasa 2 bernilai RM485 juta bagi meningkatkan *Level of Service* dan mengurangkan kesesakan trafik.

Baginda turut menzahirkan kegembiraan dengan keputusan kementerian itu meneruskan 14 projek pembangunan yang ditangguhkan sebelum ini dengan kos keseluruhan berjumlah RM167 juta.

"Beta difahamkan pelbagai kementerian dan agensi pelaksana di peringkat Pusat sedang berbincang dengan Kerajaan Negeri berhubung 74 projek baru dalam *wish list* Kerajaan Negeri.

"Ini termasuk Projek Pengukuhan Tebing Sungai Aur, Daerah Klang, sudah diluluskan untuk pelaksanaan dalam tahun 2019 dengan kos projek berjumlah RM15 juta.

"Beta yakin hubungan yang baik di antara Kerajaan Persekutuan dan Kerajaan Negeri akan terus diperkuuhkan pada masa depan demi kesejahteraan rakyat serta kemakmuran bersama," katanya.

## SELANGOR SIDANG PENGARANG

PENASIHAT: Lembaga Editorial CCSB

PENGARANG KUMPULAN: Fathi Aris Omar

PENGARANG: Nurul Farina Nazlan

PENOLONG PENGARANG: Naeem Raffi, Afeeqa Afeera & Hafizan Taib

WARTAWAN:

Nazli Ibrahim : nazli@mediaselangor.com,

Afix Redzuan : syafiq@mediaselangor.com,

Norhayati Umor : hayati@mediaselangor.com,

Sheeda Fathil : sheeda@mediaselangor.com

Nadiyah Zamlius : sitinadiyah@mediaselangor.com

Zareef Muzammil : zareefmuzammil@mediaselangor.com

JABATAN PEMASARAN & PENGIKLANAN:

Nadrah Azlan : nadrah@mediaselangor.com | 03-5523 4856 (ext 109)

JURUGAMBAR: Asri Sapie, Raheemie Arifin, Hafiz Othman & Fikri Yusof

REKA LETAK: Mohd Azwa, Nor Azrina, Farah Azila, Zul Albani

Aras 2, Carlton Holiday Hotel & Suites, No 1, Persiaran, Akutik 13/43,

Seksyen 13, 40100, Shah Alam, Selangor

Tel : 03-5523 4856 Faks : 03-5523 5856 Emel: info@mediaselangor.com

## Sedia semak elaun nazir

**SHAH ALAM** - Kerajaan Negeri sedia mempertimbangkan untuk menyemak semula elaun nazir masjid yang didakwa agak rendah, di negeri itu.

Dato' Menteri Besar, Amirudin Shari berkata, pihaknya mengakui nazir memberi sumbangan walaupun ada dalam kalangan mereka menguruskan masjid secara sambilan.

"Sebenarnya, Kerajaan Negeri sedang bergerak merangka kaedah masjid dalam bentuk pengurusan iaitu melantik pengurusan yang dibayar dengan gaji seimbang bagi mengurus masjid secara profesional.

"Walaupun nazir bekerja tanpa gaji, namun Kerajaan Negeri tetap beri sumbangan melalui elaun, namun begitu kita bersedia untuk semak kembali jika masa sesuai," katanya.

Beliau berkata demikian bagi menjawab pertanyaan Ahli Dewan Negeri Hulu Bernam, Datuk Rosni Sohar, di Sidang Dewan Negeri Selangor, pada 19 Mac lalu.

Rosni sebelum itu berkata, elaun nazir masjid sebanyak RM200 didakwa agak kecil ekoran kos perbelanjaan kini semakin tinggi.

"Adakah Kerajaan Negeri ber-

**Walaupun nazir bekerja tanpa gaji, namun Kerajaan Negeri tetap beri sumbangan melalui elaun, namun begitu kita bersedia untuk semak kembali jika masa sesuai**

**AMIRUDIN SHARI**  
Dato' Menteri Besar

hasrat meningkatkan elaun nazir dan saya harap kerajaan sedia berperhatian," katanya.



## ADN cemar DNS bakal berdepan tindakan tegas

**SHAH ALAM** - Ahli Dewan Negeri (ADN) Selangor disarankan supaya tidak menimbulkan isu sensitif dan melakukan provokasi yang menyentuh sensitiviti perkauman serta agama ketika berbahas.

Speaker Dewan Negeri Selangor (DNS), Ng Suee Lim berkata, beliau tidak akan teragak-agak mengambil tindakan tegas kepada mana-mana ADN yang sengaja memainkan sentimen terbabit, tidak menghormati DNS dan kesalahan lain yang melanggar peraturan tetap.

Sebaliknya beliau berkata, semua ADN perlu memberi tumpuan kepada isu yang menyentuh kepentingan negeri dan kawasan masing-masing.

"Saya sebagai Speaker juga menasihat ADN sama ada di pihak kerajaan atau pembangkang lebih pro aktif dan berbahas dengan sopan, beradab, disiplin serta mengikut Peraturan Tetap DNS 1965.

"Kita juga boleh elak daripada

menjadikan kemuliaan dewan ini sebagai medan provokasi, kebenarian dan sentimen perkauman bagi menimbulkan kebencian antara kaum. Saya harap ADN perlu mengambil perhatian dan elakan," katanya di Pejabat Speaker sebaik selesai Istiadat Pembukaan Persidangan Penggal kedua DNS Yang Ke-14 Tahun 2019, di sini, pada 18 Mac lalu.

Katanya, ADN boleh menjadikan DNS sebagai institusi legislatif penggubal undang-undang yang unggul dengan melontarkan cadangan, idea berasas dan membina supaya sama-sama membantu membangunkan Selangor.

"Kita mahu tumpukan kepada isu, masalah kawasan, masalah negeri dan juga memberi kritikan membina terhadap dasar yang dilaksanakan kerajaan kerana ini penting dalam usaha kita menjadikan DNS sebagai peneraju institusi legislatif, di Malaysia," katanya.

## 62 projek terbengkalai diselesaikan sejak 2008

**SHAH ALAM** - Sebanyak 62 projek perumahan terbengkalai berjaya diselesaikan dari Mac 2008 sehingga Disember tahun lalu membabitkan 26,361 unit, kata Haniza Talha.

EXCO Perumahan dan Kehidupan Bandar itu berkata, beberapa pendekatan penyelesaian yang diambil Kerajaan Negeri menerusi Lembaga Perumahan dan Hartanah Selangor (LPHS) memberikan impak positif walaupun mempunyai bidang kuasa terhad kepada tindakan secara pentadbiran sahaja.

"Antara langkah yang diambil adalah pembentukan Jawatankuasa Pemulihan Projek Terbengkalai (JPPT) bagi berbincang dan mendapatkan kerjasama semua pihak dalam memulihkan projek terbengkalai.

"LPHS turut mengeluarkan surat pengesahan projek terbengkalai supaya pembeli dapat berbincang dengan pihak bank, di samping bertemu dengan ja-

batan teknikal seperti Air Selangor, Tenaga Nasional Berhad dan Indah Water Konsortium bagi mempercepatkan pemulihran projek," katanya.

Beliau berkata demikian ketika menjawab soalan mulut dikemukakan Ahli Dewan Negeri Taman Templer, Mohd Sany Hamzah, di Dewan Negeri Selangor.

Haniza berkata, LPHS turut berperanan memberikan nasihat dan panduan kepada pembeli untuk membawa kes mereka ke Kementerian Perumahan dan Kerjaan Tempatan.

"LPHS juga mencadangkan kepada Kerajaan Negeri bentuk tindakan penguatkuasaan yang boleh diambil demi menjamin hak pembeli," katanya.

Katanya, berdasarkan 62 projek terbengkalai yang diselesaikan itu, 44 daripadanya membabitkan projek berlesen (20,292 unit) sementara 18 projek tanpa lesen (6,069 unit lain).



## Keputusan Majlis Mesyuarat Kerajaan Negeri

# 57,710 Rumah Selangorku sudah diluluskan ✓

OLEH AFIX REDZUAN

**SHAH ALAM** - Sebanyak 144 projek membabitkan 57,710 unit Rumah Selangorku diluluskan Kerajaan Negeri melalui Majlis Mesyuarat Kerajaan Negeri (MMKN) dari 2016, sehingga 28 Februari lalu.

EXCO Perumahan dan Kehidupan Bandar, Haniza Talha berkata, tiga projek membabitkan 888 unit Rumah Selangorku siap dibina dan diserahkan kunci daripada jumlah itu.

"Daripada jumlah itu, 21 projek membabitkan 11,396 unit sedang dalam pembinaan manakala bakinya 90 projek (45,426 unit)

masih dalam perancangan," katanya ketika menjawab pertanyaan mulut yang dibangkitkan Ahli Dewan Negeri Pelabuhan Klang, Azmizam Zaman Huri, di Dewan Negeri Selangor.

Mengikut perincian, Mukim Dengkil mempunyai jumlah projek tertinggi dengan 17 projek membabitkan 9,178 unit diikuti Rawang dengan 12 projek (7,842) dan Tanjung Dua Belas, 10 projek (4,100).

Dalam jawapan sama, Haniza turut memaklumkan, seramai 123,352 pemohon masih belum berjaya mendapatkan Rumah Selangorku, sehingga 1 Mac lalu.

**Daripada jumlah itu, 21 projek membabitkan 11,396 unit sedang dalam pembinaan manakala bakinya 90 projek (45,426 unit) masih dalam perancangan**

**HANIZA TALHA**  
EXCO Perumahan dan Kehidupan Bandar



## Tekad pastikan persidangan lancar

**SHAH ALAM** - Timbalan Speaker Dewan Negeri Selangor (DNS) Selangor baharu, Dr Daroyah Alwi, bertekad memastikan persidangan DNS berjalan lancar tanpa sebarang perkara tidak diingini.

Beliau yang juga Ahli Dewan Negeri (ADN) Sementa berkata, pengalaman selama sepenggal mentadbir di DNS berkenaan menjadi medan terbaik untuk beliau terus komited dalam menggalas amanah dan tanggungjawab itu.

"Kali ini, 50 ADN adalah daripada rakan saya. Jadi, kita harap sidang DNS berjalan dengan tertib dan teratur serta tiada sebarang masalah."

"Terima kasih kepada Kerajaan Negeri dan rakan ADN yang

melantik saya menjadi Timbalan Speaker yang sebelum ini kosong selepas Mohd Khairuddin Othman dilantik menjadi EXCO Pembangunan Generasi Muda dan Sukan dan Pembangunan Modal Insan, pada Disember lalu," katanya ketika ditemui SelangorKini.

Terdahulu, Dr Daroyah Alwi merangkap Timbalan Ketua Wanita KEADILAN mengangkat sumpah memegang jawatan itu pada Majlis Istiadat Pembukaan Persidangan Penggal Kedua DUN Selangor ke-14, di sini, pada 18 Mac lalu.

Beliau yang juga bekas EXCO Kesihatan, Kebajikan, Hal Ehwal Wanita dan Keluarga adalah Timbalan Speaker wanita kedua di DNS selepas EXCO Perumahan dan Ke-



hidupan Bandar yang juga ADN Lembah Jaya, Haniza Talha, yang dilantik, pada 2008.



Landasan terbaik seisi keluarga

# Hari Wanita, Hari Pinggang Sedunia tema K3W MPK

OLEH ZAREEF MUZAMMIL

**SHAH ALAM** - Bagi membina landasan terbaik buat rakyat Selangor mendapatkan maklumat berkaitan wanita, kebajikan dan kesihatan di bawah satu bumbung, Kerajaan Negeri tampil dengan Karnival 3W (Women, Welfare & Wellness), di Kompleks Sukan Pandamaran, Klang, pada 30 Mac ini.

Siri jelajah anjuran Majlis Perbandaran Klang (MPK) bakal mengangkat tema Hari Wanita dan Hari Buah Pinggang Sedunia sempena memperingati kempen ge-saan anti dera dan keganasan serta anti jenayah terhadap golongan wanita.

EXCO Kesihatan, Kebajikan, Pemberdayaan Wanita dan Keluarga, Dr Siti Mariah Mahmud berkata, selain menawarkan pelbagai bentuk bantuan dan khidmat Kerajaan Negeri kepada rakyat, inisiatif itu juga bagi mempromosi tema berdasarkan sambutan hari penting, pada bulan terbabit.

Katanya, karnival yang dijadu-



al berlangsung mulai jam 7 pagi hingga 10 malam itu akan turut menggabungkan kerjasama dan input daripada jabatan lain termasuk agensi Kerajaan Negeri atau agensi Kerajaan Pusat yang berkait rapat dengan tema berkenaan.

"Tidak kurang 20 jabatan kerajaan akan membuka booth sepanjang karnival ini berlangsung seperti khidmat pergigian dari-pada Jabatan Kesihatan Selangor termasuk pemeriksaan barah pa-

yudara, serviks dan pangkal payudara oleh Jabatan Pembangunan Wanita, Lembaga Penduduk dan Pembangunan Keluarga Negara (LPPKN).

"Malah, kita mendapat permintaan daripada agensi lain seperti Amanah Ikhtiar Malaysia dan Kumpulan Wang Simpanan Pekerja yang mahu menggunakan medium ini untuk menerang-



kan berkaitan i-Suri dan i-Saraan.

"Di sini tempat rakyat untuk datang dan melihat apa yang ditawarkan kepada mereka seperti Program Sihat Selangor, bantuan khas Anak Istimewa Selangor (AnIS) dan peluang untuk guru taska yang mengasuh kanak-kanak Orang Kelainan Upaya," katanya kepada SelangorKini.

Terdahulu, Karnival 3W yang jumlah kali diadakan di Padang Majlis Perbandaran Ampang Jaya, Pandan Indah, pada 10 Februari lalu, mendapat sambutan menggalakkan dengan penyertaan kira-kira 3,000 peserta.

Sebagai penambahbaikan daripada Karnival Sihat Selangor yang

pernah diwujudkan sebelum ini, karnival 3W peringkat MPK itu sarat dengan beberapa program lain seperti Program Intergenerasi membabitkan wanita, warga emas, OKU kanak-kanak selain penampilan khas selebriti tempatan.

Acara 10,000 langkah, senaman aerobik, demonstrasi masakan dan demonstrasi pertahanan diri wanita turut menanti pengunjung.

Pada masa sama, Dr Mariah berkata, semua 12 PBT di Selangor memainkan peranan penting dalam menjayakan karnival berkenaan dengan menampilkan tema berlainan daripada jelajah sebelumnya.

"Sepanjang tahun, secara purata sebulan sekali akan diadakan karnival seumpama ini membabitkan kesemua 12 PBT.

"Justeru, mereka yang berminat dengan penganjuran karnival 3W boleh menggunakan peluang itu setiap bulan untuk hadir menjayakan karnival ini," katanya.

Bagi mendapatkan perkembangan terkini berhubung Karnival 3W, orang ramai boleh terus melayari laman Facebook Selangor 3W atau laman sesawang PBT masing-masing.

## PBT Selangor cemerlang

**SHAH ALAM** - Duli Yang Maha Mulia Sultan Selangor, Sultan Sharafuddin Idris Shah, menzahirkan ucapan tahniah kepada semua Pihak Berkusa Tempatan (PBT) seluruh negeri atas penarafan lima bintang.

Baginda bertitah, Selangor adalah antara tiga negeri yang berjaya mencatatkan prestasi 100 peratus memperoleh penarafan itu.

"Beta mengucapkan tahniah kepada semua PBT kerana berjaya memperoleh lima bintang dalam Sistem Penarafan Bintang yang dilaksanakan oleh Kementerian Perumahan dan Kerajaan Tempatan (KPPT) itu.

"Justeru, ia adalah satu bentuk pengiktirafan kepada PBT ini yang sentiasa cemerlang dalam menyediakan perkhidmatan kepada rakyat," titah baginda pada Istiadat Pembukaan Persidangan Penggal Kedua, Dewan Negeri Selangor ke-14 Tahun 2019, pada 18 Mac lalu.

Selangor mempunyai 12 PBT iaitu Majlis Bandaraya Petaling Jaya dan Majlis Bandaraya Shah Alam serta Majlis Perbandaran Klang, Subang Jaya, Sepang, Selangor juga Ampang Jaya dan Ka-

jang.

Selain itu, Majlis Daerah Kuala Selangor, Sabak Bernam, Kuala Langat dan Hulu Selangor.

Pada masa sama, baginda menitahkan supaya pegawai Kerajaan Negeri bekerja bersungguh-sungguh, berintegriti dan memberikan komitmen tinggi kepada tugas yang diamanahkan.

Titah Sultan Sharafuddin, ia termasuk petugas yang banyak berurusan dengan kepentingan rakyat.

"Antara perkara perlu diatasi oleh PBT pada masa ini ialah memastikan sisa pepejal dapat diuruskan dengan sistematis dan berkesan. Sampah sarap di sebuah kawasan perlu dilupuskan dengan cara terbaik supaya tidak akan timbul masalah longgokan sampah tidak terkawal serta boleh mengakibatkan pencemaran bau dan membawa penyakit.

"Selain daripada itu, PBT perlu mengawasi dan mengambil tindakan tegas kepada pengusaha restoran serta kedai makan yang tidak menjaga kebersihan untuk memastikan kesejahteraan rakyat terjamin," titah baginda.



## MTES setuju iktiraf Permata Kuarza Gombak

**SHAH ALAM** - Permata Kuarza Gombak Selangor (PKGS) bakal diiktiraf sebagai sebahagian Tapak Geopark Kebangsaan ialah membuka lebih banyak peluang pekerjaan. Pada masa sama, ia mampu menarik pelancong, saintis, ahli geologi, pelajar dan pengkaji pelbagai bidang, dari seluruh dunia.

EXCO Kebudayaan, Pelancongan, Peradaban Melayu dan Warisan, Datuk Abdul Rashid Asari berkata, perkara berkenaan dipersetujui melalui Majlis Tindakan Ekonomi Selangor (MTES) yang bersidang, pada 21 Februari lalu.

Katanya, konsep pembangunan geopark itu bakal memberi tiga aspek keseimbangan iaitu kepentingan pemuliharaan sumber asli, pembangunan infrastruktur pelancongan serta aktiviti sosioekonomi yang menguntungkan masyarakat setempat.

"Antara potensi sosioekonomi

kepadu penduduk setempat jika PKGS dimasyurkan sebagai Tapak Geopark Kebangsaan ialah membuka lebih banyak peluang pekerjaan.

Pada masa sama, ia mampu menarik pelancong, saintis, ahli geologi, pelajar dan pengkaji pelbagai bidang, dari seluruh dunia.

"Lebih membanggakan, apabila tapak PKGS akan lebih terkenal dan membuka ruang pertukaran maklumat serta kerjasama dalam kalangan geopark dunia, di negara lain," katanya ketika Sidang Dewan Negeri Selangor, di sini, pada 19 Mac lalu.

Beliau berkata demikian bagi menjawab pertanyaan Ahli Dewan Negeri Hulu Kelang, Saari Sungib berkenaan langkah terbaru Kera-



jaan Negeri bagi memelihara kawasan PKGS.

Abdul Rashid berkata, geopark didefinisikan sebagai satu kawasan dengan keluasan bersesuaian, mempunyai sempadan jelas dan mengandungi beberapa tapak warisan geologi berkepentingan kebangsaan, serantau atau antarabangsa yang dibangunkan secara lestari.

Katanya, ia adalah untuk meningkatkan tahap ekonomi dan nilai budaya penduduk terutama menerusi aktiviti pelancongan.

PKGS atau turut dikenali sebagai Bukit Tabur diwartakan pada 18 Februari 2010 dengan keluasan lebih kurang 114 hektar sebagai Hutan Simpan Ulu Gombak Tambahan 1.

Ia satu keajaiban geologi bertaraf dunia yang mempunyai nilai warisan tinggi dan menjadi permata kuarza terpanjang di Asia Tenggara iaitu lebih kurang 14 kilometer.

Permata ini dibentuk daripada bendaril hidrotermal batuan granit melalui rejanan berbentuk dyke di sepanjang sesar Kuala Lumpur dan kini dianggarkan berusia antara 122 hingga 200 juta tahun.

## Ekonomi Malaysia

# Dijangka terus stabil

**KUALA LUMPUR** - Di sebalik persekitaran global yang lebih mencabar dan tidak menentu, ekonomi Malaysia dijangka terus berada pada landasan pertumbuhan stabil, disokong aktiviti sektor swasta domestik yang kukuh.

Laporan Tahunan Suruhanjaya Sekuriti 2018 menyatakan bahawa pertumbuhan akan dipacu aktiviti perkilangan yang mampar dan seterusnya disokong pengembangan sektor perkhidmatan berdaya tahan, terutama dalam sub-sektor perdagangan borong dan

runcit.

"Daripada segi permintaan, kadar upah yang stabil dan pertumbuhan dalam pengambilan pekerja akan terus memacu pengembangan penggunaan swasta. Projek baharu dan sedang dilaksanakan dalam sektor perkhidmatan dan perkilangan pula akan terus menyokong pertumbuhan pelaburan swasta.

"Usaha kerajaan untuk menggalakkan penggunaan teknologi digital dan automasi juga akan menjadi pemangkin utama kepada aktiviti pelaburan, pada masa



akan datang," katanya.

Laporan itu turut menyatakan bahawa pasaran modal domestik akan terus memainkan peranan penting dalam menyokong pertumbuhan ekonomi melalui pembentukan bagi pengembangan perniagaan dan infrastruktur.

Katanya, jumlah pengumpulan modal melalui terbitan utama dan sekunder dijangka terus kukuh terutama dalam pasaran bon.

Sementara itu, laporan berke-

naan menyatakan aktiviti dagangan di pasaran sekunder akan terus dipacu oleh perkembangan luaran, terutama pergerakan dalam aliran portfolio ekoran peralihan keciran global dan peningkatan secara umum turun naik pasaran kewangan global.

"Perkembangan yang dialami selepas krisis kewangan global (GFC) menunjukkan bahawa pergerakan trend pendasar dalam aliran portfolio bukan

pemastautin, sebahagian besarnya ditentukan oleh hala tuju dasar monetari bank pusat utama, terutama Rizab Pesekutuan Amerika Syarikat (AS).

"Di luar pergerakan trend, episod turun naik pasaran kewangan pasca GFC boleh dikaitkan dengan peristiwa negatif tertentu seperti krisis hutang Eropah, lonjakan hasil pulangan Fed US, kejutan penurunan nilai yuan China, kejatuhan harga minyak, pemilihan presiden AS, dan ketegangan perdagangan."

Katanya, prospek bagi pasaran modal domestik pada 2019 akan terus dipengaruhi perkembangan utama di peringkat global, terutama hala tuju dan rentak dasar monetari global dengan turun naik pasaran didorong ketidakpastian berterusan terhadap risiko utama, khususnya berkaitan ketegangan perdagangan berterusan dan keimbangan terhadap pertumbuhan global. - BERNAMA

## Yakin catat RM50 bilion eksport pada 2020

**PETALING JAYA** - Perbadanan Pembangunan Industri Halal (HDC) yakin memenuhi sasaran mengutip RM50 bilion nilai eksport menjelang 2020. Naib Presidennya, Hanisofian Alias berkata, sasaran itu disokong menerusi peningkatan eksport dalam produk tambah nilai, dengan India sebagai negara tujuan baru.

"India yang berpotensi menjadi pasaran baharu, sedang memperluas pasaran halalnya sendiri dan memerlukan produk sawit iaitu oleokimia," kata dia kepada pemberita ketika pelancaran Persidangan Ha-

lal Dunia 2019, pada 15 Mac lalu. Memandangkan inventori minyak sawit Malaysia kini tinggi, sebanyak 3.05 juta tan metrik, permintaan oleh India dapat membantu mengurangkannya, katanya.

"Sasaran untuk mencapai sasaran itu (nilai eksport bernilai RM50 bilion) sangat mencabar, memandangkan ketika ini minyak sawit berhadapan cabaran akibat sentimen negatif oleh EU (Kesatuan Eropah), selain saingan daripada minyak soya.

"Indonesia, negara pengeluar minyak sawit yang juga menghadapi tahap inventori yang lebih tinggi, mendorongnya men-

jual produk itu pada harga yang murah, sekali gus meletakkan minyak sawit pada kedudukan yang sukar," katanya.

Sementara itu, Hanisofian berkata HDC akan menganjur Persidangan Halal Dunia ke-11 2019 (WHC 2019), yang dihoskan Kementerian Hal Ehwal Ekonomi dari 3 hingga 4 April depan. Ber tema 'Membina Ekonomi Halal yang Kukuh: Integrasi Global dan Amalan Etika', persidangan dua hari itu akan meneroka peluang dan cabaran yang dihadapi industri halal menerusi siri wacana bertujuan mengintegrasikan kemajuan teknologi, tadbir urus etika dan



Halal Industry  
Development Corporation

pasaran pesat membangun. Agen- si di bawah Kementerian Hal Ehwal Ekonomi itu, mengumumkan jumlah nilai eksport halal bagi tahun lalu merosot 7.6 peratus kepada RM40 bilion daripada RM43 bilion yang dicatatkan pada 2017.

Hanisofian berkata, sektor halal mengalami kemerosotan eksport dalam semua kluster kecuali

kosmetik dan penjagaan diri. Secara keseluruhannya, pengurangan dalam eksport halal tahun lepas sebahagian besarnya di sumbangkan oleh dua kelompok halal, iaitu penurunan 50 peratus minyak sawit daripada RM3.6 bilion tahun sebelumnya. Sementara, penurunan bahan kimia industri sebanyak 36.7 peratus kepada RM357.77 juta pada 2018 daripada RM563.54 juta sebelumnya.

Pengimport utama produk halal Malaysia ialah Singapura dengan RM4.6 bilion diikuti oleh China (RM4.5 bilion), Jepun (RM2.5 bilion), AS (RM2.4 bilion) dan Indonesia (RM1.9 bilion). - BERNAMA

## Robert Kuok kekal paling kaya

**SINGAPURA** - Tan Sri Robert Kuok mengekalkan kedudukan nombor satu dalam senarai Orang Paling Kaya Forbes Malaysia 2019 dengan nilai bersih AS\$12.8 bilion, walau-pun kekayaannya merosot AS\$2 bilion, menurut Forbes Asia.

Senarai Orang Paling Kaya Forbes Malaysia 2019 yang dikeluarkan pada 14 Mac lalu menyebut 30 hartawan Malaysia menyaksikan kekayaan mereka merosot, manakala 11 lagi menikmati peningkatan. Sementara itu, Tan Sri Quek Leng Chan dari Hong Leong (Malaysia) menambah kekayaan sebanyak AS\$ 2.2 bilion dan kekal pada kedudukan nombor dua dengan nilai bersih AS\$9.4 bilion.

Tan Sri Teh Hong Piow dari Public Bank memperoleh AS\$700 juta, meningkat satu anak tangga ke nombir tiga dengan nilai bersih AS\$6.7 bilion. Lima hartawan teratas dalam senarai itu ialah Tan Sri Ananda Krishnan di tempat keempat dengan AS\$6.2 bilion, susut AS\$900 juta apabila saham dalam penyedia perkhidmatan

tenaga Bumi Armada susut 78 peratus tahun ini, hingga 1 Mac lalu. Tan Sri Lee Shin Cheng dari IOI Corporation dan IOI Properties menduduki tempat kelima, dengan nilai kekayaannya merosot AS\$200 juta kepada AS\$5.4 bilion.

Wong Thean Soon menduduki tempat ke-48, selepas mengalami kerugian terbesar apabila nilai bersihnya menjunam 63 peratus kepada AS\$280 juta. Saham syarikatnya My E.G Services, yang menawarkan akses perkhidmatan kerajaan secara dalam talian, terjejas selepas pilihan raya tahun lalu akibat persepsi bahawa ia dikait rapat dengan kerajaan terdahulu.

Seorang pelabur besar dalam syarikat itu, kedudukan Datuk Dr Norraesah Mohamad, satu-satunya wanita dalam senarai tahun lalu, turut merosot.

Jutawan lain yang menyaksikan kekayaan mereka merosot termasuk Tan Sri Syed Mokhtar AlBukhary yang mengekalkan kedudukannya di tempat ke-12 walaupun kekayaan merosot



AS\$200 juta kepada SS\$1.7 bilion.

Saham syarikat berkaitan infrastrukturnya menyusut susulan kajian berterusan ke atas projek infrastruktur mega Malaysia.

Seorang lagi hartawan yang mengalami kemerosotan ialah Pengurus Genting, Tan Sri Lim Kok Thay, yang berada di nombor tujuh dengan kekayaan bernilai AS\$4.4 bilion. Beliau jatuh satu

tempat daripada nombor enam tahun lalu apabila kekayaannya susut AS\$300 juta. Pendatang baharu, Abdul Kadier Sahib, memasuki senarai itu buat kali pertama di tempat ke-49 dengan nilai bersih AS\$275 juta.

Beliau ialah Pengarah Serba Dinamik Holdings, syarikat pembekal minyak dan gas yang dilancarkan pada 2017 dan menyaksikan sahamnya melambung.

Pengasas syarikat, Datuk Dr Mohd Abdul Karim Abdullah, yang berada di tempat 40, dengan nilai AS\$345 juta, memulakan perniagaannya setahun lalu dan menyaksikan kenaikan bersihnya sebanyak 11 peratus, tahun ini.

Menurut Forbes Asia, terdapat dua hartawan menyertai semula senarai tahun ini. Tan Sri Kua Sian Kooi dari KSK Group menduduki tempat ke-35 dengan nilai bersih AS\$420 juta, manakala Datuk Loh Kian Chong dari Oriental Holdings kembali dalam senarai di tempat ke-45 dengan nilai bersih AS\$320 juta. Nilai bersih minimum untuk dimasukkan dalam senarai tahun ini ialah AS\$250 juta, turun daripada AS\$ 300 juta, tahun lalu.

Senarai ini disusun menggunakan maklumat daripada individu, bursa saham, penganalisis, pangkalan data peribadi, agensi kerajaan seperti Suruhanjaya Syarikat Malaysia dan sumber lain.

Jumlah nilai bersih adalah berdasarkan kepada harga saham dan kadar pertukaran pada penutupan pasaran, pada 28 Februari lalu.

Syarikat persendirian dinilai menggunakan nisbah kewangan dan perbandingan lain dengan syarikat yang sama dengan dagangan awam.

Anggaran termasuk kekayaan pasangan, dan jika mereka merupakan pengasas syarikat, ia turut mengambil kira kekayaan anak hasil dari syarikat itu. Dalam kes kekayaan anggota keluarga adalah berdasarkan kepada syarikat yang sama, ahli itu digabungkan menjadi satu penyenaraian, selagi masing-masing mempunyai kekayaan yang mencukupi untuk memenuhi syarat. Senarai penuh boleh didapati dalam terbitan terkini Forbes Asia, yang sudah berada, di pasaran.

- BERNAMA



Pencemaran sisa kimia

# Tiada kes baharu dirujuk ke hospital



Mangsa dibantu bagi mendapatkan rawatan

**JOHOR BAHRU** - Tiada kes baharu dirujuk ke hospital ekoran pencemaran sisa kimia di Sungai Kim Kim, Pasir Gudang,, kata Penggerusi Jawatankuasa Kesihatan, Alam Sekitar dan Pertanian Johor, Dr Sahruddin Jamal.

"Jumlah pesakit yang sudah dibenarkan pulang selepas mendapatkan rawatan di Hospital Sultanah Aminah dan Hospital Sultan Ismail seramai tujuh orang.

"Hanya tinggal seorang pesakit yang masih mendapatkan rawatan di Unit Rawatan Rapi berbanding dua pesakit sebelum ini dan dalam keadaan sta-

bil," kata beliau dalam kenyataan di sini, pada 19 Mac lalu.

Dr Sahruddin berkata, sejak 17 Mac hingga jam 12 tengah hari tadi 19 Mac, 44 pesakit masih dirawat, di hospital.

Secara keseluruhan, kualiti udara di persekitaran Sungai Kim Kim kini stabil, namun pemantauan akan tetap diteruskan sehingga 2 April nanti dan data akan dikeluarkan, dari semasa ke semasa.

Dr Sahruddin berkata, pasukan pemantau terdiri daripada anggota Jabatan Alam Sekitar dan Jabatan Kimia Malaysia melakukan ujian tanah dala-

man terhadap sampel yang dikumpul setiap hari selepas kerja pembersihan.

Katanya, pasukan penilai pula ditubuhkan bagi membuat pemantauan di kawasan yang terjejas, membabitkan Jabatan Kimia, Jabatan Bomba dan Penyelamat Malaysia, Jabatan Alam Sekitar, Kementerian Kesihatan Malaysia dan Jabatan Meteorologi.

Selain itu, beliau turut mengingatkan orang ramai supaya tidak terpengaruh dengan sebaran maklumat yang belum sahih melalui aplikasi WhatsApp dan media sosial. - BERNAMA

## Tingkat penguatkuasaan pantau pencemaran

**JOHOR BAHRU** - Agensi berkaitan dan pihak berkuasa tempatan perlu mempertingkatkan lagi langkah penguatkuasaan mereka dalam memantau tahap pencemaran di semua sungai, di negeri itu.

Presiden Persatuan Alam Sekitar Malaysia, Vincent Chow yang membuat gesaan demikian berkata, langkah pemeriksaan perlu kerana penguatkuasaan sedia ada kurang berkesan dalam menangani masalah berkenaan.

Katanya, dalam tempoh beberapa tahun kebelakangan ini, beliau mendapat banyak aduan daripada masyarakat setempat

berhubung pencemaran di kawasan mereka, namun tiada tindakan konkrit diambil pihak berkenaan dalam menyelesaikan isu terbabit.

"Kekurangan kehadiran mereka (penguat kuasa) untuk memantau pencemaran tidak hanya berlaku di Sungai Kim Kim, malahan di sungai lain.

"Ini adalah satu kelemahan besar dan saya percaya kejadian ini adalah tampanan kepada pihak terbabit bagi mempertingkatkan keanggotaan mereka yang membuat pemantauan," katanya, lapor BERNAMA, pada 16 Mac lalu.

Chow berkata, bagaimanak

insiden pembuangan sisa kimia di Sungai Kim Kim berulang, Jabatan Alam Sekitar dan pihak yang berkenaan perlu mengambil serius setiap aduan yang dibuat penduduk berhubung pencemaran.

"Jika penduduk atau pertubuhan bukan kerajaan membuat aduan, bermakna perkara yang diadu memang berlaku.

"Pergi siasat dan adakan pertemuan dengan penduduk supaya kita tahu gambaran yang sebenar.

"Ini kerana ada perkara kita tidak boleh buat rumusan ringkas, sebaliknya perlu menyeluruh," katanya.

## Agong zahir rasa simpati kepada mangsa

**KUALA LUMPUR** - Yang di-Pertuan Agong, Al-Sultan Abdullah Ri'ayatuddin Al-Mustafa Billah Shah, menzhirkan rasa simpati terhadap mangsa pencemaran sisa kimia di Pasir Gudang, Johor dan mendoakan mereka kembali pulih.

Istana Negara dalam kenyataan pada 16 Mac lalu berkata, baginda memandang serius insiden terbabit dan berharap mangsa yang menjalani rawatan saringan awal di Medic Base, Stadium Tertutup Pasir Gudang berupaya menjalani proses pemeriksaan dengan baik.

"Baginda juga menzhirkan ucapan terima kasih dan menyokong tindakan segera yang diambil Kerajaan Negeri dan agensi berkaitan khususnya Kementerian Kesihatan, Kementerian Tenaga, Sains, Teknologi, Alam Sekitar dan Perubahan Iklim, Jabatan Bomba dan Penyelamat serta jabatan lain yang berkaitan," menurut kenyataan itu.

Sultan Abdullah turut memo-



hon rakyat Malaysia mendoakan keadaan pencemaran sisa toksik di Pasir Gudang tidak akan mengakibatkan keadaan yang lebih memudaratkan kepada penduduk setempat. Sehingga tengah malam 15 Mac, 65 pesakit baharu dimasukkan ke wad akibat pencemaran sisa kimia di Sungai Kim Kim, menjadikan jumlah mereka yang masih dirawat di hospital seramai 371 orang.

Setakat jam 3 petang 15 Mac, seramai 4,035 mangsa menerima rawatan ekoran pencemaran yang berlaku sejak 7 Mac. - BERNAMA



## Pembersihan Sungai Kim Kim selesai

**JOHOR BAHRU** - Proses pembersihan sepanjang 1.5 kilometer (km) Sungai Kim Kim yang dimulakan sejak 13 Mac akibat pembuangan sisa kimia sudah selesai, pada 17 Mac lalu.

Menteri Tenaga, Sains, Teknologi, Alam Sekitar dan Perubahan Iklim, Yeo Bee Yin berkata, bagaimanapun, pemantauan terus dilakukan ketika ini bagi meneliti sebarang langkah yang boleh dilakukan.

"Sungai Kim Kim sejauh 1.5 km yang tercemar sudah dibersihkan tetapi kita mahu tengok apa-apa lagi yang kita boleh touch up."

"Ketika ini, kita boleh kata ia adalah hari pemantauan. Selepas pantau, baru kita boleh tengok apa langkah seterusnya yang boleh dibuat," katanya kepada pemberita di Pusat Gerakan Jawatankuasa Pengurusan Bantuan Bencana yang dibuka di Majlis Perbandaran Pasir Gudang, Menara

Aqabah, di sini.

Turut hadir, Pengarah Jabatan Alam Sekitar (JAS) Johor, Datuk Dr Mohammad Ezanni Mat Salleh.

Bee Yin berkata, pada masa sama, seramai 30 pasukan membabitkan anggota JAS dan Jabatan Kimia digerakkan ke 30 sekolah di sekitar kawasan terjejas bagi memantau kualiti udara dengan menggunakan alat pengesan gas.

Beliau berkata, kesemua 30 sekolah itu jaraknya tiga hingga sembilan kilometer dari Sungai Kim Kim.

"Sebelum ini kita sudah buat (memantau kualiti udara) di tempat berbeza-beza dan didapati kualiti adalah tahap selamat.

"Tetapi, liputan kita akan menjadi besar kerana pembersihan sungai sudah pun siap," katanya dengan menambah hasil laporan penuh kualiti udara terbabit didekahkan, pada 18 Mac lalu. - BERNAMA

Isu syarikat penerbangan negara

# PM: Ada pihak minat beli Malaysia Airlines

**KUALA LUMPUR** - Perdana Menteri, Tun Dr Mahathir Mohamad mendedahkan ada pihak dari dalam dan luar negara berminat membeli syarikat penerbangan negara, Malaysia Airlines Berhad (MAB).

Bagaimanapun, katanya, kerajaan masih perlu mengkaji sebelum membuat keputusan yang akan menentukan masa depan syarikat penerbangan itu.

"Ada pihak tertentu yang ingin membeli MAS (MAB), jadi kita tidak tolak. Kita nak kaji sama ada perlu jual atau tidak," katanya pada sidang media di lobi Parlimen, pada

20 Mac lalu.

Beliau berkata, ia kerana syarikat itu tetap mengalami kerugian sekalipun mengambil pengurusan luar. Ditanya berhubung saranan bekas pemimpin syarikat itu yang mahukan MAB kekal bawah kerajaan, Dr Mahathir berkata, perkara terbabit turut akan ditimbang.

"Saya sayang MAS, saya mahu MAS ini dijadikan satu syarikat penerbangan nasional tetapi nam-pak seolah-olah kita tidak mampu," katanya.

Dr Mahathir berkata, strategi kerajaan terdahulu yang menyuntik RM6 bilion dan memberhen-

tikan 6,000 pekerja nyata gagal memberikan keuntungan kepada syarikat selain menyebabkan banyak pesawat tidak digunakan sepenuhnya.

Katanya selepas pemberhentian pekerja, syarikat itu "tidak terbang seperti dahulu", bermakna pengurangan pekerja tidak membawa sebarang perbezaan.

"Jika kita kurang pekerja tetapi kita *maintain* status yang lama baharulah ada *saving* (penjimatan)," katanya.

Pada 5 Mac lalu, Khazanah Nasional, sayap pelaburan kerajaan, dilaporkan mengalami rosot nilai



RM7.3 bilion tahun lalu dengan sebahagian besarnya disumbangkan oleh MAB.

Khazanah adalah satu-satunya pemegang saham MAB selepas mengambil alih syarikat penerbangan itu pada 2014 dan ia sudah menyuntik dana RM6 billion untuk membaiki prestasi syarikat,

namun usaha terbabit gagal.

Dr Mahathir sebelum ini dilaporkan berkata, kerajaan akan mengkaji pelbagai opsyen sebelum membuat keputusan berhubung masa depan Malaysia Airlines sama ada akan menuup, menjual atau membiayainya semula. — BERNAMA

## Kenyataan Senator Anning jelik - Azmin

**KUALA LUMPUR** - Kenyataan Senator Fraser Anning dari Australia yang menyalahkan program imigresen dan Islam sebagai punca insiden penembakan di Christchurch disifatkan amat jelik dan tidak logik, kata Menteri Hal Ehwal Ekonomi, Dato' Seri Mohamed Azmin Ali.

Beliau berkata, ramai yang berduak cita dan melahirkan simpati kepada keluarga mangsa terhadap jenayah keji itu, justeru kenyataan Senator Anning adalah tidak sen-

sitif dan kurang disenangi serta bersifat perkauman.

"Beliau yang seharusnya menunjukkan perasaan simpati dan belas kasihan, sebaliknya mempermalukan sikap rasis dan kebencian terhadap Islam serta umat Islam dengan menyalahkan mangsa dan tidak sebaliknya menyalahkan pelaku jenayah," katanya dalam kenyataan.

Oleh itu, Mohamed Azmin menerusi semua rakyat Malaysia dan mereka yang berfikiran waras un-

tuk mengutuk Senator Anning serta kenyataannya.

Dua rakyat Malaysia dilapor-kan cedera dalam insiden penembakan di Masjid Al-Noor dan Masjid Linwood dan kedua-dua mereka kini menerima rawatan di hospital.

Menurut laporan media, insiden penembakan secara rambang yang berlaku pada jam 1.40 tengah hari (8.40 pagi waktu Malaysia), pada 15 Mac lalu meragut sekurang-kurangnya 49 nyawa manakala puluhan yang lain cedera. — BERNAMA



## Jimat Harapan Rakyat diperluas ke seluruh negara

**KUALA LUMPUR** - Pasar Jualan Jimat Harapan Rakyat yang menawarkan harga barang runcit lebih murah akan diperluas ke seluruh negara bagi membantu meringankan perbelanjaan masyarakat khususnya golongan isi rumah berpendapatan rendah (B40).

Menteri Pembangunan Luar Bandar, Datuk Seri Rina Harun berkata, inisiatif itu akan dilaksanakan secara berperingkat melalui kerjasama dengan Dewan Perniagaan Jualan Jimat Harapan Rakyat (DPJJHR) yang juga pengajur program itu.

"Perbincangan akan kita buat lebih terperinci dengan DPJJHR supaya ia dapat diperluaskan dan kerap diadakan serta menjadi program berkala, setiap bulan."

"Kita akan lihat untuk kawasan



luar bandar mungkin keperluannya berbeza tetapi daripada segi makanan, ia pasti diperlukan mana-mana rakyat tanpa mengira di bandar atau luar bandar," katanya.

Beliau berkata demikian selepas merasmikan Program Pasar Jimat Harapan Rakyat di Perumahan Awam Seri Perlis 2, Datuk Keramat, di sini, pada 17 Mac lalu.

Rina yang juga Ahli Parlimen Titiwangsa berkata, buat masa ini inisiatif itu sudah dijalankan di empat negeri iaitu Kuala Lumpur, Selangor, Negeri Sembilan dan Johor.

Program Pasar Jimat Harapan Rakyat yang bermula pada tahun lalu adalah inisiatif DPJJHR, sebuah pertubuhan bukan kerajaan, menawarkan barang keperluan harian seperti ayam, ikan dan sayur pada harga sehingga 40 peratus lebih murah. — BERNAMA

## Mahkamah Khas Perkahwinan Mei ini

**KUALA LUMPUR** - Mahkamah Khas Perkahwinan, Hadhanah dan Nafkah yang antara lain akan diberi kuasa menyita harta bekas suami yang culas memberi nafkah kepada bekas isteri dijangka beroperasi, pada Mei ini.

Menteri di Jabatan Perdana Menteri, Datuk Seri Dr Mujahid Yusof berkata, setakat ini proses pengoperasian mahkamah berada pada peringkat akhir bagi mendapatkan pandangan daripada pelbagai pihak berhubung pentadbirannya, sebelum ia dibentangkan di mesyuarat Cabinet.

"Ia dah berada di peringkat akhir dengan pihak AG (Peguam Negara), Kementerian Kewangan dan Kementerian Pembangunan Wanita, Keluarga dan Masyarakat sudah memberikan pandangan masing-masing.

"Mungkin dalam tempoh dua minggu lagi, ia dah bersedia un-

tuk diserahkan kepada peringkat Cabinet.

Jika sudah serahkan ke Cabinet ia akan masa dua hingga tiga minggu, sebelum diluluskan," katanya kepada pemberita selepas merasmikan Seminar Hari Wanita 2019, di Dewan Besar Institut Ke-fahaman Islam Malaysia (IKIM), di sini, pada 17 Mac lalu.

Katanya pelaksanaan mahkamah terbabit menggambarkan komitmen Kerajaan Pakatan Ha-rapan (PH) untuk membela nasib bekas isteri yang diabaikan bekas suami.

Sementara itu, Mujahid berkata, tiga teras utama gagasan pentadbiran Islam di bawah kerajaan PH iaitu *Rahmatan Lil Alamin* (agama yang membawa rahmat), Maqasid Syariah dan Modul Ma-laysia akan diserahkan kepada Majlis Raja-Raja, dalam masa terdekat.

Katanya, tiga teras terbabit su-



dah dibincang, dibahas dan dipersetuju oleh Majlis Kebangsaan Hal Ehwal Islam yang pertama kali bermesyuarat, pada 14 Mac lalu.

"Apa yang sudah dipersetuju oleh majlis terbabit akan dimaklumkan kepada Majlis Raja-Raja. Dengan itu Raja-raja akan tahu apa yang dalam hal ehwal Islam yang dibuat oleh kerajaan ba-haru ini," katanya.

Seminar Hari Wanita Antara-bangsa 2019 yang dianjurkan bersama oleh IKIM dan Pertubuhan Ikram Malaysia (IKRAM) membincangkan isu berkaitan wanita termasuk pembabitan wanita, dalam masyarakat dan organisasi.

Turut hadir pada majlis perasmian selama sehari itu adalah Ketua Pengarah IKIM, Datuk Prof Dr Azizan Baharuddin dan Presiden IKRAM, Dr Mohd Parid Sheikh Ahmad. — BERNAMA



Lokasi ketiga

## Polis dimaki kes serangan masjid

OLEH UMIRAH IZRIN MOHAMAD SAID

**SHAH ALAM** - Pengendali laman web forum Kiwi Farms, memaki penyiasat New Zealand apabila pihak berkuasa memohon ia mendedahkan tulisan dan video yang dibuat suspek.

Joshua Moon, memperlekeh permintaan sarjan kanan John Michael dan melabel negara itu "tidak relevan" dan "s\*\*\*hole country", lapor portal News.com.au.

Polis menuntut data di laman itu dan juga 8chan, forum internet yang digunakan oleh Brenton Tarrant, 28, untuk memuatkan rancangan, bersama manifesto setebal 73 muka surat, sebelum serangan.

Dalam e-melnya, Michael meminta sebarang tulisan dan data seperti alamat IP dan alamat digunakan penyerang itu, kini ditahan sebelum dibawa ke mahkamah, pada 5 April ini.

Moon turut menghina polis New Zealand apabila diminta membuang rakaman siaran langsung tembakan berkenaan.

Facebook sudah memadam 1.5 juta video yang memaparkan insiden itu.

Namun, Kiwi Farms, 8chan dan Voat dilaporkan masih terus membenarkan rakaman terbabit dikongsi. New Zealand mlarang ia disebarluaskan dan pesalah boleh dihukum penjara, sehingga 10 tahun.

Pada masa sama, pengganas yang menyerang dua masjid hingga mengorbankan 50 orang Islam pada 15 Mac lalu bercadang menembak sasaran di lokasi ketiga tetapi percubaannya berjaya dihalang polis.

"Polis yakin kami menahannya ketika dalam perjalanan untuk serangan baharu," kata Pesuruhjaya Polis New Zealand pada 20 Mac lalu seperti dilaporkan portal South China Morning Post.

Dalam laporan itu, yang dipetik daripada agensi AFP, beliau menjelaskan polis mengetahui sasaran terbabit tetapi enggan mendedahkannya ekoran Tarrant sedang didakwa.

Laporan sebelum ini menyebut suspek ingin ke masjid Ashburton.

## DNS, Parlimen Malaysia kutuk tembakan di Christchurch

**SHAH ALAM** - Dewan Negeri Selangor sebulat suara meluluskan usul tergempar mengutuk serangan berdarah di dua masjid, di Christchurch, New Zealand, pada 15 Mac lalu.

Usul terbabit dikemukakan Ahli Dewan Negeri (ADN) Hulu Kelang, Saari Sungib di bawah Peraturan Tetap 17(1) dan dibahaskan ADN kerajaan dan pembangkang iaitu Syamsul Firdaus Mohamed Supri (Taman Medan), Datuk Dr Ahmad Yunus Hairi (Sijangkang), Lim Yi Wei (Kampung Tunku), Mohd Fakhrulrazi Mohd Mokhtar (Meru) dan Law Weng San (Banting).

Dato' Menteri Besar, Amirudin Shari dalam penggulungannya berkata, tindakan kejam dan melanggar batasan kemansuaan itu sememangnya satu perlakuan ekstrim serta diluar pemikiran manusia.

Setakat ini, 50 orang dilaporkan ter-

korban dalam kejadian tembakan yang berlaku di Masjid Al-Noor berhampiran Hagley Park dan Masjid Linwood, di Christchurch, New Zealand.

Pada 18 Mac lalu, Parlimen Malaysia mengambil tindakan sama meluluskan usul tergempar itu dibentangkan Ahli Parlimen Port Dickson, Datuk Seri Anwar Ibrahim, sebelum dibahaskan Ahli Dewan Rakyat Pakatan Harapan, Barisan Nasional dan PAS.

Anwar berkata, fahaman *white supremacy* yang bertapak di Amerika Syarikat semakin menular ke negara barat lain.

Usul itu turut dibahas dan disokong Ahli Parlimen Iskandar Puteri, Lim Kit Siang; Ahli Parlimen Kuala Nerus, Mohd Khairuddin Aman Razali dan Ahli Parlimen Kepala Batas, Datuk Seri Reezal Merican Naina Merican.

## Kartun kiwi bersedih pukau media sosial

**SHAH ALAM** - Kartunis New Zealand mendapat perhatian meluas di media sosial apabila karyanya dianggap mewakili suasana muram susulan serangan di dua masjid, di Christchurch.

Shaun Yeo melakarkan burung kiwi, simbol negara terbabit, yang berlinangan air mata dengan latar belakang hitam selepas tembakan di dua masjid yang mengorbankan 50 orang.

Semakan SelangorKini setakat 20 Mac lalu mendapati ilustrasi itu menerima lebih 42,000 perkongsian di Facebook dan 2,500 lagi di Twitter sejak ia dimuatkan pada hari kejadian, pada 15 Mac lalu.

Seorang lagi artis negara itu, Ruby Jones, memaparkan lakaran ringkas seorang wanita kulit putih menenangkan wanita Islam bagi menggambarkan insiden terbabit, lapor portal Stuff.

Beberapa pelukis kartun di negara lain turut menyatakan simpati dan mengecam tindakan Brenton Tarrant, 28, di Masjid Al-Noor dan Linwood ketika jemaah bersiap untuk solat.

Portal New Zealand itu turut melaporkan kempen memakai hijab pada Jumaat ini (22 Mac) bagi menyatakan sokongan kepada umat Islam.

Kempen di media sosial menggunakan tanda pagar #headscarfforharmony.

Setakat 20 Mac lalu, enam jenazah mangsa tembakan rambang itu sudah diserahkan kepada keluarga masing-masing untuk disemadikan.

Dalam kejadian jam 1.40 tengah hari 15 Mac lalu, puluhan orang ditembak. Seramai 29 lagi masih dirawat, manakala lapan daripada mereka dalam keadaan kritis.

Sementara itu, seorang mangsa dibenarkan keluar dari hospital.

Pada 16 Mac lalu, penembak yang berasal dari Australia didakwa atas kes pembunuhan dan berdepan beberapa pertuduhan lain.

Kerajaan negara itu menyifatkan suspek seorang "pengganas sayap kanan yang kejam dan melampau" yang ingin mencetuskan suasana takut dan menggalakkan keganasan terhadap umat Islam.

## Madonna, 'remaja telur' salur derma

**SHAH ALAM** - Penyanyi popular, Madonna dan pelakon terkenal, Ben Stiller menyalurkan derma ribuan dolar Amerika Syarikat (AS\$) kepada tabung mangsa serangan di dua masjid, di Christchurch.

Derma melalui dana The Go-FundMe yang dibuka Guy Oseary, pengurus Madonna dan kumpulan rock U2 itu, menyarkan 100,000 dolar New Zealand (RM280,000).

Semakan SelangorKini pada 18 Mac lalu menunjukkan ia berjaya mengutip NZD89,481 (RM250,500). Oseary sendiri menyumbangkan sebanyak AS\$18,000 (RM73,429).

Penyanyi wanita yang terkenal dengan lagu 'Like A Virgin' dan 'Papa Don't Preach' itu menyumbang sebanyak NZD27,000 (RM75,600), lapor Stuff.

Portal New Zealand itu turut

melaporkan remaja yang memecahkan telur di kepala Senator Fraser Anning, ingin menderma sebahagian besar sumbangan kepadanya untuk mangsa serangan terbabit.

Will Connolly, 17, menarik perhatian dunia pada 16 Mac lalu apabila tersebar video rakaman tindakannya terhadap senator Australia itu.

Selain tindakan berani remaja

Australia, satu petisyen dalam talian mendesak Anning digugurkan daripada Parlimen mendapat sokongan ramai.

Semakan SelangorKini turut mendapati lebih 1.3 juta orang menyokong kempen itu bagi membantah ucapannya yang menyalahkan umat Islam dan pendatang terhadap insiden itu.





Komited junjung tadbir urus cekap, telus dan berintegriti

# Membingkai muafakat dalam melahirkan ummatan wasata

Konvensyen pada kali ini menepati hasrat dan aspirasi Kerajaan Selangor yang beriltizam dan terus komited dalam menjunjung prinsip tadbir urus yang cekap, telus serta berintegriti. Kerana itu, saya turut terpanggil untuk hadir dalam program yang sangat besar erti pada hari ini untuk berkongsi hasrat dan hala tuju Kerajaan Negeri ke arah membudayakan pengurusan masjid dan surau yang berintegriti, lestari serta efisien.



Saya bersyukur ke hadirat Allah SWT kerana cinta-cita Kerajaan Negeri untuk memastikan pembangunan negeri sejajar dengan prinsip Maju Bersama dan terkehadapan sebagai suatu Smart State yang lestari sudah mula dibincangkan oleh kepemimpinan masyarakat serta organisasi, di peringkat akar umbi.

Ini termasuk agenda untuk menransformasikan pengurusan masjid dan surau di Selangor supaya lebih dinamik, efektif serta kondusif dalam memberi perkhidmatan kepada ahli kariah. Era globalisasi dan era digital yang sedang dilalui menuntut semua kepemimpinan masjid serta surau untuk melihat cabaran pengurusan masjid juga surau dalam konteks yang lebih luas, terbuka selain fikiran yang positif.

Oleh kerana itu, saya ingin menegaskan bahawa pengurusan masjid dan surau perlu ditadbir dengan penuh komitmen serta fokus oleh seluruh ahli jawatankuasa untuk mengangkat institusi masjid serta surau sebagai medium pembangunan ummah. Ke arah ini, jawatankuasa perlu memastikan masjid dan surau sentiasa peka dengan tanggungjawab sosial kepada ahli kariah, berdamping dengan semua lapisan masyarakat termasuk menyantuni golongan kelainan upaya serta merancang program pengimaran yang berspadu, konsisten, berjadual juga yang berteraskan *result oriented*. Ini adalah mustahak supaya kita merancang program yang mempunyai hala tuju dan berdampak tinggi.

Sebagai sebuah negeri pintar, masjid dan surau adalah bahagian penting pelaksanaan *internet of things*, sekali gus menjadikan penggunaan kemudahan teknologi *updated* adalah suatu yang aula.

Kemudahan ini boleh digunakan untuk mengemaskini daftar ahli kariah, kemudahan bersedekah, berwakaf dan berinfak, berkongsi program ilmu, pengurusan kewangan juga penyampaian maklumat.

Janganlah sesekali kita alpa bahawa Allah SWT menyeru kita kepada *Darul Salam*, negeri aman tenteram, Islam dan *Salam* itu berbasar daripada suatu kata akar yang sama. Pada masa yang sama ingatlah bahawa *Ehsan* yang terikat kemas dengan Selangor dan istilah perkataan *Hasan* atau keindahan juga daripada kata akar yang sama. Kerana itu kesungguhan kita berdakwah perlu didasari semangat keamanan dan keindahan bukannya kebencian serta perpecahan.

Kemudahan dan prasarana fizikal masjid perlu dipertingkat supaya mampu menggalas fungsi sebagai pusat komuniti setempat dan pusat riadah. Persekutuarannya juga menitikberatkan aspek kebersihan dan keindahan yang akan menggamit serta memukau hati jemaah untuk hadir mengimarahkan masjid sebagai rumah kedua jemaah. Suasana inilah yang ditunggu-tunggu dan dinanti-nantikan oleh Kerajaan Negeri, MAIS dan JAIS untuk berlaku ledakan serta anjakan transformasi pengurusan masjid serta surau di era baru alaf 21 yang amat mencabar, kompleks juga rencam.

Penganjuran konvensyen seperti ini, begitu juga dengan wujudnya Peraturan-Peraturan Masjid dan Surau (Negeri Selangor) Tahun 2017, di samping Garis Panduan dan pekeliling yang dikeluarkan oleh MAIS dan JAIS adalah untuk memastikan pengurusan masjid dan surau dapat dipimpin untuk mencapai tahap pengurusan masjid lestari yang diharapkan.

Pada saat dan ketika yang sungguh mencabar ini apabila setengah tempat yang masyarakatnya terus

berpolimik juga berkonflik disebabkan perbezaan pandangan politik, perbezaan pandangan hukum serta isu khilafiyah, doktrin kumpulan yang difatwakan menyeleweng oleh Jawatankuasa Fatwa Negeri Selangor dan isu keruntuhan etika serta akhlak muslim. Semua ini menuntut kesabaran serta komitmen tinggi dalam kalangan pegawai masjid dan surau untuk melipatgandakan usaha, di samping mendukung tanggungjawab besar yang diamanahkan oleh Allah SWT.

Untuk memastikan pengurusan masjid dan surau lestari, penghayatan tadbir urus berintegriti dalam institusi masjid dan surau menjadi lebih penting. Pertama, kerana institusi masjid surau adalah rumah Allah SWT yang dijamin kemuliaannya di sisi Allah SWT. Kedua, pengurusan masjid dan surau adalah cerminan pola kehidupan sesebuah komuniti masyarakat. Ketiga adalah aura kekuatan, kesungguhan serta keikhlasan anggota jawatankuasa dalam mengurus masjid akan dirasai oleh denyut nadi masyarakat yang akan mendorong mereka untuk bersama dalam aktiviti masjid. Jika pentadbir masjid dan surau nya baik, maka akan terpancar kehidupan masyarakat yang saling bersatu padu dan saling hormat menghormati.

Penegasan serta perintah Allah SWT dalam Surah At Taubah Ayat 18 : Maksudnya ; "Hanya-sanya yang memakmurkan masjid-masjid Allah hanyalah orang-orang yang beriman kepada Allah dan hari kemudian serta tetap mendirikan solat, menunaikan zakat dan tidak takut kepada sesiapapun kecuali kepada Allah. Maka merekalah orang yang diharapkan dan termasuk golongan yang akan mendapat petunjuk" Saya amat mengharapkan supaya institusi masjid dan surau terus mampu membingkai muafakat dalam kalangan ummah selain

melahirkan masyarakat yang berpegang teguh kepada dasar akidah *Ahli Sunnah Wal Jamaah*.

Saya juga menggesa institusi masjid dan surau mampu melahirkan *ummatan wasata* iaitu umat yang cemerlang tetapi mengamalkan prinsip kesederhanaan dalam kehidupan mereka. Tidak ekstrim dalam tindak tanduk dan tidak angkuh atau sompong. Sebaliknya menjadi golongan yang ikhlas dalam melaksanakan segala amal maafur dan kebajikan demi menjunjung prinsip yang ditegaskan oleh Allah SWT iaitu *hayaatun toyib batun* suatu kehidupan yang baik.

Bagi tujuan itu, jawatankuasa kariah perlu bertanggungjawab dengan kelakuan ahli kariah berhubung dengan agama Islam seperti membendung aktiviti tidak bermoral dan memastikan tiada pelanggaran undang-undang syariah, dalam kariah masing-masing.

Sehingga bulan Februari 2019, sebanyak 424 masjid, 280 surau solat Jumaat dan 1800 surau terdapat di Selangor. Dengan jumlah yang saya fikir amat tinggi ini, pastinya khidmat serta kesungguhan serta keikhlasan semua pihak amat ditagih bagi memacu pentadbiran masjid dan surau di Selangor supaya lebih lestari, holistik dan cemerlang.

Kerajaan Negeri akan terus memberi komitmen kepada MAIS dan JAIS dalam usaha memastikan pengurusan masjid, di negeri ini. Pada tahun 2015, Kerajaan Negeri meluluskan elaun tambahan sebanyak RM150 kepada imam masjid kariah. Kemudian pada tahun 2017, kadar elaun imam di naikkan sebanyak RM300. Ini menjadikan jumlah bayaran elaun imam masjid kariah yang dibayar oleh Kerajaan Negeri berjumlah RM 4,003,200.

Pada tahun 2017 juga, Kerajaan Negeri meluluskan bayaran insen-

tif khas kepada nazir masjid berjumlah RM500 dan RM300 kepada pengurus surau. Seterusnya, insentif khas kepada siak masjid dan surau sebanyak RM300, pada tahun 2018.

Ketika pembentangan Bajet 2019, Kerajaan Negeri meluluskan peruntukan sebanyak RM1 juta untuk menaik taraf 10 masjid kariah kepada masjid pengurusan yang akan ditadbir sepenuhnya oleh pengurus, penolong pengurus dan pembantu pengurus, mulai 1 Julai 2019.

Sebagai kesimpulannya, pertama, marilah kita mengikhlaskan niat dalam melaksanakan kerja yang dipertanggungjawabkan bagi mendapatkan keredhaan Allah SWT dalam mengurus rumah Allah SWT. Kedua, menjadikan integriti dan amalan tadbir urus sebagai nilai utama dalam pekerjaan dan elemen penting dalam pengurusan institusi masjid serta surau bagi memastikan kedua-dua institusi ini terus dihormati oleh masyarakat.

Ketiga, meningkatkan iltizam untuk bekerja bersungguh-sungguh untuk melestari pengurusan masjid di Selangor supaya hasrat untuk menjadikan masjid dan surau sebagai benteng akidah, perpaduan dan penyatuan ummah akan tercapai. Keempat, menghormati apa juga keputusan, dasar dan hala tuju yang ditetapkan oleh MAIS dan JAIS terutama saran dan nasihat Duli Yang Maha Mulia Sultan Selangor selaku Ketua Agama Islam yang sering menitahkan supaya masjid menjadi zon aman, zon kondusif beribadah, bebas daripada sebarang elemen politik kepartian dan menjadi landasan penting penyatuan ummah.

Konvensyen Melestarikan Pengurusan Masjid dan Surau Negeri Selangor, pada 16 Mac 2019



1



- 1 Ahli Dewan Negeri bergambar bersama DYMM Sultan Selangor, Sultan Sharafuddin Idris Shah
- 2 Sultan Sharafuddin Idris Shah mencemar duli memeriksa perbarisan
- 3 Beberapa wakil wanita Pakatan Harapan di Dewan Negeri Selangor
- 4 Kakitangan awam tidak melepaskan peluang bergambar bersama Speaker dan Timbalan Speaker
- 5 Bacaan doa dimulakan sebelum DYMM Sultan Sharafuddin Idris Shah bertitah
- 6 Ahli Dewan Negeri bersalaman mengiringi keberangkatan pulang Sultan Sharafuddin Idris Shah



OLEH NORHAYATI UMOR

**SERDANG** - Selangor muncul negeri yang mencatatkan kadar pengangguran terendah iaitu kurang dari tiga peratus.

Justeru, bagi mengekalkan atau menyasarkan kadar sifar, Dato' Menteri Besar, Amirudin Shari berkata, Kerajaan Negeri komited melaksanakan pelbagai usaha ke arah itu.

"Selangor adalah negeri yang menunjukkan prestasi baik dalam menyediakan peluang kerja kepada rakyat khususnya, di sekitar Lembah Klang.

"Antara usaha yang dilakukan adalah memastikan pelaburan berada dalam keadaan baik dan konsisten.

"Jumlah projek pembangunan tertinggi ini dapat membuka ruang dan peluang pekerjaan untuk rakyat, di negeri ini," katanya ketika ditemui di Selangor Mega Job Fair 2019, di MAEPS, di sini, pada 16 Mac lalu.

Amirudin berkata, selain menyediakan peluang pekerjaan kepada setiap golongan, Kerajaan Negeri turut mementingkan kualiti dalam sesuatu pekerja.

Katanya, hal itu kerana pi-

Muncul negeri kadar terendah

# Fokus ke arah sifar pengangguran

haknya mahu tenaga kerja bukan sahaja sekadar mengisi kekosongan tetapi melahirkan individu berkemahiran.

"Satu lonjakan apabila kali pertama dalam tempoh 28 tahun, Selangor berjaya meraih pelaburan domestik berjumlah RM18.9 bilion.

"Pastinya, kita akan terus meneliti apakah jenis pelaburan yang memberi nilai tambah selain menyediakan peluang pekerjaan kepada rakyat Selangor melalui lima kluster utama yang digarisankan," katanya.

Lima kluster utama itu ialah elektrikal dan elektronik, makanan dan minuman, peralatan dan jentera, sains hayat dan peralatan pengangkutan.



## Bantu tingkat sosio ekonomi

**SERDANG** - Pengajuran Selangor Mega Job Fair 2019 diyakini dapat membantu meningkatkan taraf hidup dan sosioekonomi rakyat, di negeri itu.

EXCO Pembangunan Generasi Muda, Sukan dan Pembangunan Modal Insan, Mohd Khairuddin Othman berkata, program itu juga mampu mengurangkan kadar pengangguran, sekali gus membantu memajukan dan melestarikan ekonomi negeri.

Katanya, rakyat Selangor juga akan menjadi lebih progresif, berdaya saing dan produktif seiring hala tuju Kerajaan Negeri, pada masa hadapan.

"Acara kali ini turut membantu syarikat yang memerlukan tenaga kerja khususnya di tahap kritis dengan mendahulukan pembabitan dalam kalangan warga tempatan.

"Ia adalah pengajuran terbesar dan bersejarah bagi Selangor, tahun ini. Oleh itu, kita memilih MAEPS sebagai lokasi program kerana lebih kondusif untuk kelancaran sesi temuduga terbuka oleh majikan serta mampu menampung kapasiti pengunjung yang lebih ramai," katanya.

Beliau berkata demikian pada Majlis Perasmian Selangor Mega Job Fair 2018, di MAEPS, di sini, pada 16 Mac lalu.

Mohd Khairudin berkata, sebanyak 180 majikan menawarkan lebih daripada 11,000 peluang pekerjaan terbuka kepada warganegara Malaysia.

Katanya, sambutan yang diterima kali ini meriah dan membanggakan kerana ia turut didatangi pelajar atau lepasan graduan, dari negeri lain.

Selangor Mega Job Fair 2019 adalah acara tahunan Kerajaan Negeri sejak 2014 bertujuan menyediakan peluang kerja kepada



**Acara kali ini turut membantu syarikat yang memerlukan tenaga kerja khususnya di tahap kritis dengan mendahulukan pembabitan dalam kalangan warga tempatan**

**KHAIRUDDIN OTHMAN**  
EXCO Pembangunan Generasi Muda,  
Sukan dan Pembangunan Modal Insan

masyarakat setempat, sekali gus mengurangkan kadar pengangguran di Selangor khususnya generasi muda.

Untuk rekod, kadar pengangguran Selangor mengikut Jabatan Perangkaan Malaysia adalah di antara kadar yang terendah di Malaysia iaitu pada kadar 2.8 peratus, pada 2017 berbanding 3.2 peratus, pada 2016.

Antara kelainan yang ditampilkan ialah pembabitan badan beruniform seperti Polis Diraja Malaysia, Jabatan Bomba dan Penyelamat Malaysia, cabang perkhidmatan Angkatan Tentera Malaysia seperti Tentera Darat Malaysia dan Tentera Udara DiRaja Malaysia, selain memberikan peluang pekerjaan kepada golongan kurang upaya.

Selain itu, jurubahasa isyarat bersama sukarelawan didatangkan khas untuk memberikan keutamaan kepada golongan OKU bagi membantu melancarkan perjalanan program berkenaan.

Tahun lalu, seramai 3,177 calon iaitu hampir 60 peratus berjaya mendapat tawaran pekerjaan daripada majikan melalui program itu.

## Selangor Mega Job Fair buka peluang OKU

**SERDANG** - Lebih 20 syarikat yang menyertai Selangor Mega Job Fair (SMJF), di MAEPS Serdang menyediakan peluang pekerjaan kepada golongan Orang Kurang Upaya (OKU).

EXCO Pembangunan Generasi Muda dan Sukan dan Pembangunan Modal Insan, Mohd Khairuddin Othman berkata, acara tahunan itu adalah salah satu inisiatif Kerajaan Negeri membantu golongan terbabit.

"Program ini turut mendapat sambutan menggalakkan daripada seluruh negeri termasuk Pahang, Terengganu,

Kuala Lumpur dan negeri lain.

"Diharap, SMJF akan diteruskan pada masa akan datang bagi melahirkan modal insan yang proaktif, progresif dan berdaya saing," katanya pada sidang media Majlis Perasmian SMJF, di sini, pada 16 Mac lalu.

Turut hadir, Dato' Menteri Besar, Amirudin Shari dan EXCO Kesihatan, Kebajikan, Pemberdayaan Wanita dan Keluarga, Dr Siti Mariah Mahmud.

SMJF tahun ini membabitkan agensi kerajaan dan swasta yang menawarkan lebih 11,000 peluang pekerjaan.

## 3.5 juta terima manfaat 'Boost'

**SUNGAI BESAR** - Kerajaan Negeri berusaha menjadikan rakyat Selangor sebagai masyarakat pintar meliputi semua aspek kehidupan termasuk membabitkan kemudahan berbelanja.

Pengurus Projek Smart Selangor Delivery Unit (SSDU), Azemah Hassan berkata, bagi tujuan itu, SSDU memperkenalkan aplikasi e-wallet, Boost.

Beliau berkata, aplikasi itu mendapat sambutan memberangsangkan khasnya masyarakat, di Selangor.

"Sehingga kini, aplikasi itu sudah dimuat turun oleh 3.5 juta pengguna dengan 60 peratus daripadanya adalah pengguna, di Selangor.

"E-wallet ini boleh digunakan di pasar raya, restoran, kedai pakaian Jakel, pasar malam dan pasar pagi yang memaparkan kod QR kami," katanya.

Beliau berkata demikian ketika ditemui Media Selangor pada program Jelajah 360 Smart Selangor, segmen Smart Selangor Ke Arah Masyarakat Tanpa Tunai turut diajak bagi mempromosi gaya hidup pintar kepada masyarakat, di Sungai Besar.

Selangor", di Stadium Sungai Besar, di sini, pada 16 Mac lalu.

Katanya, langkah itu sejajar dengan hasrat Kerajaan Negeri menjadikan Selangor sebagai Smart State, menjelang 2025.

Azemah berkata, aplikasi itu boleh dimuat naik di PlayStore dengan menawarkan kemudahan e-wallet bersama deposit maksimum RM250 dan RM1,500.

"Kategori wallet biasa maksimum RM250 dengan perbelanjaan maksimum sebulan RM1,500 dan wallet premium pula maksimum RM1,500 dan penggunaan maksimum RM4,500 sebulan," katanya.

Bagaimanapun, tiada hak minima dikenakan untuk pengguna memasukkan nilai wang di dalam e-wallet ini.

Sebelum itu, pada program Jelajah 360 Smart Selangor, segmen Smart Selangor Ke Arah Masyarakat Tanpa Tunai turut diajak bagi mempromosi gaya hidup pintar kepada masyarakat, di Sungai Besar.

Negeri Selangor adalah sebuah negeri yang bertuah, berkat daripada keharmonian rakyatnya dan keutuhan sistem pentadbirannya, membolehkan Selangor terus maju dengan pertumbuhan positif yang dicatatkan, dalam sektor perkhidmatan, pembuatan dan juga pembinaan.

Ini menjadikan Negeri Selangor antara nadi utama pembangunan ekonomi negara. Dengan kedudukannya yang strategik dan tersedia prasarana yang baik, Selangor sentiasa menjadi pilihan pelabur-pelabur domestik dan luar negara yang datang untuk menjalankan perniagaan mereka di Negeri Selangor, walaupun keadaan ekonomi global pada tahun 2019 diramalkan suram dan angka pertumbuhan ekonomi dunia dijangka akan merosot kepada Tiga Perpuluhan Lima Peratus (3.5%) berbanding Tiga Perpuluhan Tujuh Peratus (3.7%), pada tahun 2018.

Beta dimaklumkan bahawa sebanyak Dua Ratus Empat Puluh Satu (241) projek perkilangan telah diluluskan di negeri Selangor bagi sepanjang tahun 2018, iaitu yang tertinggi di dalam negera, berbanding sebanyak Dua Ratus Dua (202) projek perkilangan yang telah diluluskan pada tahun 2017. Ini merupakan peningkatan sebanyak Sembilan Belas Peratus (19%) dari segi bilangan projek.

Manakala jumlah nilai pelaburan yang telah diluluskan pula adalah berjumlah Ringgit Malaysia Lapan Belas Perpuluhan Sembilan Empat Tujuh Bilion (RM18.947 bilion) berbanding sebanyak Ringgit Malaysia Lima Perpuluhan Lima Sembilan Dua Bilion (RM5.592 bilion) pada tahun 2017. Pencapaian yang luar biasa ini merupakan peningkatan sebanyak Dua Ratus Tiga Puluh Lapan Peratus (238%) berbanding tahun sebelumnya dan ini merupakan pencapaian tertinggi di dalam sejarah negeri Selangor.

Ekoran daripada projek-projek perkilangan yang diluluskan itu sebanyak Sembilan Ribu Satu Ratus Sembilan Puluh Enam (9,196) peluang pekerjaan telah diwujudkan di Negeri Selangor. Beta berkenan apabila Selangor terus menjadi pilihan destinasi pelaburan oleh banyak syarikat ternama dunia antaranya kilang Sony EMCS di Bangi yang merupakan kilang pengeluar TV LED Sony yang terbesar di dunia dan juga menjadi satusatunya pusat R&D bagi produk TV Sony di luar Negara Jepun.

Manakala syarikat IKEA daripada Sweden sedang membangunkan pusat pengedaran serantau yang ke-3 terbesar di dunia yang terletak di Pulau Indah. Semenara itu, di Bukit Raja, syarikat Toyota telah melancarkan 'first line off vehicle' dari kilang mereka



# Negeri bertuah, ekonomi terus meningkat

**Sedutan titah ucapan Duli Yang Maha Mulia, Sultan Sharafuddin Idris Shah ketika Istiadat Pembukaan Persidangan Penggal Kedua, Dewan Negeri Selangor ke-14 Tahun 2019 pada 18 Mac**

yang terbaru yang menggunakan teknologi pembuatan kereta tercanggih di dunia.

Di Sepang pula, telah ditubuhkan syarikat Hartalega yang mengeluarkan sarung tangan nitrile yang terbesar di dunia yang berupaya mengeluarkan lebih 30 bilion sarung tangan setahun.

Pencapaian yang sangat membanggakan ini juga turut diterjemahkan menerusi keyakinan yang ditunjukkan oleh pelabur asing yang mana pelaburan langsung asing (FDI) menunjukkan peningkatan sebanyak Empat Ratus Perpuluhan Tujuh Peratus (400.7%) berbanding tahun sebelumnya.

Pada tahun 2018, Negeri Selangor telah menerima sebanyak Ringgit Malaysia Sepuluh Perpuluhan Lapan Tiga Tujuh Bilion (RM10.837 bilion) pelaburan langsung asing, berbanding tahun sebelumnya sebanyak Ringgit Malaysia Dua Perpuluhan Satu Enam Empat Bilion (RM2.164 bilion.)

Ini menunjukkan tahap keyakinan yang tinggi oleh para pelabur terhadap Kerajaan Negeri dan rakyat Selangor. Beta yakin Kerajaan Negeri melalui Invest Selangor dengan kerjasama MIDA dan MATRADE dapat mempertingkatkan lagi inisiatif untuk membawa masuk pelaburan yang besar ke

dalam Negeri Selangor.

Beta berkenan dengan usaha Invest Selangor yang telah mewujudkan *Selangor Talent Portal Application*. Aplikasi ini dapat dijadikan sebagai platform dan rujukan kepada para pelabur untuk mendapatkan sumber tenaga mahir yang bersesuaian dan juga menjadi platform kepada graduan yang baru menamatkan pengajian untuk mendapatkan pekerjaan yang bersesuaian dengan kelulusan dan kemahiran yang dimiliki.

Dewan Negeri Selangor telah meluluskan Belanjawan 2019 berjumlah Ringgit Malaysia Dua Perpuluhan Lima Enam Bilion (RM2.56 bilion). Belanjawan yang telah dibentangkan oleh Memanda Dato' Menteri Besar ini juga telah memperkenalkan strategi baru bagi memacu kemajuan ekonomi negeri mengikut kluster.

Sebanyak sepuluh (10) kluster telah dikenal pasti untuk dimasukkan di dalam rancangan pembangunan secara bersepadu, antaranya adalah Kluster Industri Aeroangkasa, Kluster Eko-Pelancongan, Kluster Perikanan dan Akuakultur, Kluster Pertanian dan Industri Asas Tani, Kluster Pendidikan dan termasuk lima (5) kluster lain yang bertujuan untuk mencari potensi-potensi baharu ekonomi di Negeri Selangor.

Beta percaya dengan strategi ini, Kerajaan Negeri akan berupaya untuk mencipta nilai tambah di sesuatu kawasan secara inklusif serta meningkatkan daya saing Negeri Selangor dalam menghadapi persaingan di peringkat nasional dan juga global.

Beta berkenan dengan kerjasama yang kukuh di antara Kerajaan Persekutuan dan Kerajaan Negeri Selangor pada masa ini. Prinsip federalisme yang sihat dan matang akan dapat menjana pertumbuhan ekonomi dan memakmurkan negeri.

Beta menyambut baik usaha Kerajaan Persekutuan menggubal dasar yang berteraskan pertumbuhan dan perkongsian kemakmuran.

Dasar ini akan membangkitkan semangat kerjasama bagi berkongsi kekayaan berkonsepkan "shared prosperity". Beta berkenan dan berterima kasih kepada Kerajaan Persekutuan yang telah memperuntukkan sejumlah Ringgit Malaysia Dua Perpuluhan Enam Bilion (RM 2.6 Bilion) untuk melaksanakan Tiga Puluh Sembilan (39) projek baru dan Dua Ratus Tujuh Puluh Empat (274) projek sambungan dalam Rolling Plan 4 (RP4) Tahun 2019, di Negeri Selangor.

Beta juga berkenan usaha gigih

Kementerian Hal Ehwal Ekonomi untuk memuktamadkan segera pelaksanaan Projek Menaiktaraf Jambatan Klang Ketiga Fasa 2 bernilai Ringgit Malaysia Empat Ratus Lapan Puluh Lima Juta (RM485 Juta) bagi meningkatkan Level of Service dan mengurangkan kesesakan trafik.

Beta juga amat gembira dan berkenan dengan keputusan Kementerian Hal Ehwal Ekonomi untuk meneruskan Empat Belas (14) projek pembangunan yang ditangguhkan sebelumnya dengan kos keseluruhan bernilai Ringgit Malaysia Satu Ratus Enam Puluh Tujuh Juta (RM167 Juta).

Beta difahamkan pelbagai Kementerian dan agensi pelaksana di peringkat Persekutuan sedang berbincang dengan Kerajaan Negeri Selangor mengenai Tujuh Puluh Empat (74) projek baru dalam "wish list" Kerajaan Negeri. Ini termasuk Projek Pengukuh Tebing Sungai Aur, Daerah Klang telah diluluskan untuk pelaksanaan dalam

Tahun 2019 dengan kos projek bernilai Ringgit Malaysia Lima Belas Juta (RM15 Juta). Beta yakin hubungan yang baik di antara Kerajaan Persekutuan dan Kerajaan Negeri Selangor akan terus diperkuuhkan di masa depan demi kesejahteraan rakyat dan kemakmuran bersama.



# Intertekstualiti dalam Upin & Ipin: Keris Siamang Tunggal

OLEH ZA'IM YUSOFF


**S**ekalipun kata "creative" berasal daripada kata akar "create" mengisyaratkan kepada penciptaan baru, kebanyakannya karya tidak lebih daripada apa yang disifatkan Aristotle dalam Poetics, yakni sejenis mimesis, bahasa mudahnya peniruan.

Namun, peniruan berbeza dengan penipuan seperti ciplak cuplik kerana kedua-duanya mampu dibezakan. Misalnya, mimesis kelas tinggi mampu dihirau melalui alat kritikan mimetik antaranya menerusi teori intertekstualiti.

Intertekstualiti adalah kajian hubung kait antara suatu teks dengan teks lain yang dipelopori oleh Julia Kristeva, tokoh linguistik Perancis hasil pengembangan teori dialogik Bakhtin sekitar 1960-an menerusi tulisan "Le mot, le dialogue et le roman".

Kristeva meringkaskan intertekstualiti sebagai sebarang penyerapan dan transformasi daripada karya-karya terdahulu (dikenali sebagai hipogram) yang kemudian dihirau melalui prinsip-prinsip intertekstualiti seperti transformasi (pemindahan), modifikasi (pengubahsuai), paralel (keselaruan), eksrep (petikan), ekspansi (pengembangan), eksistensi (unsur baru), haplogogi (pengguguran), defamiliarisasi (luar kelaziman), demitefikasi (penentangan) dan konversi (putar balik).

Ringkasnya melalui kaedah intertekstualiti, naratif Upin & Ipin: Keris Siamang Tunggal yang idea dan cerita asalnya ditukangi Hajah Ainon Ariff, Nur Naquyah Burhanud-



din and Aliya Nazlan membawa penikmat sinema mendenai ziarah muhasabah.

Ziarah yang dimaksudkan adalah memercikkan nuansa-nuansa naratif legenda dongeng Melayu yang pernah disinematkan (sekali gus menjadi hipogram bagi filem ini) seperti Si Tanggang (1961), Singapura Dilanggar Todak (1961), Bawang Putih Bawang Merah (1959), Raja Bersiong (1963, 1968), Batu Belah Batu Bertangkup (1959), juga legenda ciptaan P. Ramlee seperti Nujum Pak Belalang (1959) dan Anakku Sazali (1956).

Setelah menziarahi naratif, filem itu menggugah dengan mengajak kita jujur bermuhasabah seraya berani mengubah bagi melengkapkan sebarang sudut pandang yang memerlukan rejuvenasi ke atas interpretasi, sekali gus mengkayakan penghayatan khazanah bangsa.

Selama ini, nilai pengajaran yang sering dikuak tanggap termasuklah jendela legenda dongeng Melayu lebih cenderung ditelusuri menerusi bingkai pendekatan tarhib (ancaman) berbanding pendekatan targhib (anjuran).

Ini diamati dengan cermat oleh Bapa Pendidikan Malaysia, Che Aminuddin Baki dalam "Aminuddin Baki di Rumah Persekutuan (2015)". Beliau berpandangan pendekatan pendidikan informal khususnya di rumah lebih banyak menggunakan perkataan "jangan" seraya tidak berani mencuba, mitos yang lebih bertujuan menakut-nakutkan kanak-kanak sehingga persoalan suratan azali yang menjadi wahana pendidikan tanpa sedar menjadi penghalang kepada kemajuan bangsa dan masyarakat Melayu.

Di sinilah, filem berperanan memaparkan secara konsisten watak-

watak protagonis dalam naratif legenda yang dijungkir balik menjadi antagonis, bukan semata-mata ingin menguar "inilah kreativiti cicit piut Tok Selampit Melayu moden". Bahkan lebih cemerlang, beginilah kita harus pandang bagi menghadapi 'todak-todak' masa depan yang menerjang.

Misalnya, acapkali dalam legenda Si Tanggang termasuklah naratif filem Si Tanggang (1961) arahan Jamil Sulong, kompas moral dihala kepada Si Tanggang yang mencuaikan hak seorang ibu bermula dengan si anak meremehkan tanggungjawabnya kepada si ibu. Hal ini membawa kepada nilai pengajaran secara tarhib iaitu si anak jangan sesekali menderhaka kepada ibunya.

Namun, Upin & Ipin: Keris Siamang Tunggal melalui prinsip ekspansi menduga kita untuk mengubah halaan kompas moral ke arah pihak yang dicuaikan hak — apakah pantas seorang ibu menggunakan 'keramat sumpahan' sebegitu? Selain hal ini bersifat lencongan plot yang bermutu tanpa menolak dapatkan nilai pengajaran dalam naratif terdahulu; naratif baru sebegini menemukan kita dengan nilai pengajaran segar.

Akhirnya, kita mendapak pesan betapa hubungan kekeluargaan bukan sekadar berlegar antara hak dengan tanggungjawab bahkan kasih sayang yang menerima penuh kewujudan tiap-tiap insan dalam keluarga sebagai amanah golongan sufi untuk kita "memakai sifat-sifat Tuhan yang mendahulukan kemaafan berbanding kemurkaan".

Intertekstualiti paling mahal dalam Upin & Ipin: Keris Siamang Tunggal adalah melalui prinsip haplogogi dengan memperdalam makna peribahasa mahsyur, "Harimau mati meninggalkan belang; manusia mati meninggalkan nama" tatkala mengetengahkan naratif Singapura Dilanggar Todak.

Kendatipun kembala naratif ternyata menjelaskan batang-batang pisang mengubui Inderaloka daripada serangan tsunami todak kemudian batang-batang pisang hadir di luar dugaan sebagai bedil-bedil meriam sehingga laskar musuh terkebil-kebil dihunjam, sesuatu yang nyata adalah watak Hang Nadim pula sangaja dijadikan.

Secara halus, 'kehilangan' watak Hang Nadim memperdalam sudut pandang peribahasa berkenaan betapa nama yang diinggalkan manusia setelah pemergiannya adalah erat terkait pada jasa-jasanya yang membuktik. Namanya mungkin hilang tetapi watak Hang Nadim pasti muncul dikenang saat jasa-jasanya timbul direntang di layar

besar wayang.

Sejurnya, keberanian Les' Copaque dalam mempertaruhkan deretan intertekstualiti seumpama ini adalah sesuatu yang berisiko khususnya menyoroti penerimaan khalayak penonton yang belum pernah memesrai naratif legenda dongeng Melayu.

Di sini terserlahnya kebijaksanaan pasukan produksi saat memanfaatkan pelbagai instrumen naratif misalnya melalui lirik-lirik OST khususnya Buai Laju-Laju dalam episod menziarahi naratif lagenda sebelum meneruskan naratif dengan episod tafsir semula menerusi lensa muhasabah.

Rangkap pertama Buai-Buai Laju iaitu Sunyi sepi hidup tanpa keluarga/ Menagih kasih ibunda/ Diriku ini terperangkap di sini/ Sanggupnya difitnah insan yang dikasih — dengan tembang puitis sederhana alunan mezzo-soprano Ernie Zakri sudah cukup menumpahkan gambaran naratif asal legenda malah diselitkan imbas muka bagi lencongan plot pada kalimah "terperangkap di sini".

Terperangkap adalah paradoks ironis lantaran yang dipenjara adalah Bawang Putih yang memfitnah sedangkan lirik ini mengisyaratkan Bawang Merah yang terperangkap bahkan kolam air yang ditanggap sebagai laluan penyelesaian kembala menjadi kering walhal arus air mengalir, di daratan sekeliling.

Simbol kata dan simbol visual ini usainya bertujuan memberatkan lagi makna keterperangkapan spiritual dalam diri Bawang Merah lantas memperkenal sisi antagonisnya sendiri melalui prinsip modifikasi pada peleraian sebelum jujur mengikuti jejak langkah separalel kisah mulia Saidina Abu Bakar as-Siddiq yang memilih untuk memaafkan Mistah Ibn Usasah, saudaranya sendiri yang terlibat memfitnah Ummul Mukminin Aisyah semasa musibah Hadisul Ifki.

Simbol Keris Siamang Tunggal juga dihipogram dari Keris Panjang Beruk Berayun, alat kebesaran diraja Selangor sebagai lambang Raja Berdaulat iaitu legenda mengisahkan keris yang tidak berlok hanya berfungsi dengan baik jika berada di tangan mereka yang benar-benar layak sahaja.

Dalam filem ini, bilah ghaib dimunculkan berdikit-dikit sebagai instrumen bagi lengkapkan rejuvenasi ke atas interpretasi legenda dongeng Melayu secara bertahap-tahap. Selain itu, keadaan keris yang ringan pada sahabat yang setia sebaliknya menjadi berat pada seteru yang derhaka. Ini ternyata menganjurkan prinsip eksistensi dalam intertekstualiti untuk menguatkan makna moral bagi watak protagonis, Mat Jenin selain menceritakan keluhuran fitrah kanak-kanak menerusi watak Upin dan watak Ipin.

Tuntasnya, Upin & Ipin: Keris Siamang Tunggal yang disutradari tiga pengarah berbakat, Adam Amiruddin, Syed Nurfaiz Khalid dan Ahmad Razuri Roseli benar-benar menyuntik sedar betapa pohon sinema sebenar adalah saat pembikinnya berpaut erat pada naratif yang berakar tunjang jati diri warisan. Hanya dengannya, barulah sinema kita mampu berkembang mekar berhayat panjang, tinggi dipandang dirakam zaman.

## SAJAK BUAT LELAKI YANG KELUAR DARI HALAMAN SEBUAH BUKU

Seorang lelaki keluar dari helaian buku dan memberiku seteguk penawar dari kata-katanya yang meliuk seperti ular yang menyusur akar.

Kemudian dia meninggalkan sepasang kasut bersama nota yang bertandakan namaku "jangan lelah bermain dalam dunia kata-kata".

Ah, lalu kusarung kasut dan berlari ke padang sajak, kutebas semak fikiran yang tumbuh tajam juga merapikan wajah bunga yang pucat.

Bulan dan bintang di tangan langit kuambil ketika malam ketiduran lantas kupakai selendang awan sebagai penyamaran untuk sebuah pengembaraan paling berani.

Kerana belum puas bermain kata aku mahu ke halaman sebelah di situ kutemukan baki penawar kuteguk, menghilangkan hausku sebelum kupilih untuk menulis tentangnya, di bahu sebuah jalan.

Hidayyah At Mizi  
Sendayan

OLEH AFIX REDZUAN

Ramai pastinya tidak menyangka sehelai jersi yang rosak sebenarnya boleh dibaiki kecuali dalam kala pengumpul tegar dan kembali kelihatan cantik seperti asal jika dicuci dengan teknik yang betul.

Namun, tidak semua orang mempunyai kemahiran itu tambahan kurangnya pengetahuan berkaitan penggunaan alatan bersesuaian juga boleh mengakibatkan sehelai jersi yang rosak gagal diselamatkan buat selamanya.

Sahrin Amir, 35, salah seorang pengumpul tegar jersi di Malaysia sejak 2011 mula menyediakan perkhidmatan mencuci jersi, sejak 2014.

Bagi sesetengah orang, mungkin mereka mampu untuk menghilangkan lapisan pertama kesan nama pemain dan penaja yang rosak pada sehelai jersi tetapi tidak mempunyai kapakaran khusus membuat lapisan gam pada pakaian.

"Asalnya saya baik pulih baju sendiri yang diperolehi, di *bundle*. Keadaan jersi yang ditemui ketika di *bundle* kebanyakannya sudah rosak."

"Dahulu, tiada orang yang mempunyai kapakaran mencuci dan baiki jersi yang rosak, maka saya cuba lakukannya sendiri.

"Saya pernah bekerja di sebuah syarikat swasta dan menjaga operasi di bahagian kimia. Di situ, saya belajar mencari bahan kimia yang sesuai untuk mencuci kerosakan jersi," katanya.

Bercerita lanjut berhubung perkhidmatan yang ditawarkan, Sahrin berkata, pada awal pembabitannya kawan rapat antara yang awal menghantar jersi untuk dibaik pulih sebelum memberanikan diri menanggung tempahan daripada orang luar.

Beliau berkata, *thinner* adalah antara bahan asas diperlukan untuk mencuci tetapi adakalanya memerlukan penggunaan bahan kimia tertentu terutama bagi menanggalkan kesan gam yang terlekat.

Katanya, penggunaan bahan kimia boleh mendatangkan lebih masalah jika gagal dikendalikan dengan sebaiknya terutama proses mencuci membabitkan jersi tulen dan

# 'Dukun' jersi jana pulangan lumayan

Melihat sehelai jersi yang bersih selepas dicuci adalah satu kepuasan memandangkan minat mendalam terhadap bidang ini

SAHRIN AMIR  
'Dukun' Jersi

mencecah  
ratusan  
atau ribuan  
ringgit.

"*Thinner* adalah asas diperlukan untuk mencuci, manakala baju yang sukar memerlukan penggunaan bahan kimia khusus. Apabila menggunakan bahan kimia, risiko adalah pada tapak tangan.

"Ada beberapa bahan kimia bersifat tajam dan tidak boleh digunakan sewenang-wenangnya. Jika salah guna, ia mampu merosakkan baju. Itulah antara risiko yang saya terpaksa tanggung setiap kali ingin mencuci sehelai jersi."

"Jika kerosakan pada jersi berada di tahap maksimum walaupun pada awalnya tampak mudah untuk dibersihkan, saya tidak akan mengambil risiko untuk mencuci bagi mengelakkan kejadian tidak diingini," katanya.

Katanya, antara kesukaran yang biasa dihadapi adalah mencuci jersi era 80 dan 90an kerana kebiasaan-nya corak pada baju itu dicetak terus menggunakan pewarna fabrik.

Beliau berkata, melihat sehelai jersi yang bersih selepas dicuci adalah satu kepuasan memandangkan minat mendalam terhadap bidang ini.

"Jersi Liga Malaysia lama kebanyakannya menggunakan material *silk screen*. Ada juga membabitkan sulaman di beberapa bahagian.

"Saya tidak akan berpuas hati lagi baju yang dicuci tidak bersih. Biar baju berlubang asalkan bersih kerana lubang boleh ditampal dan dibaiki. Kalau baju tidak bersih selepas dicuci, ia mengecewakan saya."

"Itu prinsip saya pegang dalam perniagaan ini sehingga kawan gelarkan saya 'dukun' atau 'doktor jersi' kerana boleh membersihkan jersi yang rosak," katanya.

Dengan kebolehan yang ada, Sahrin lebih selesa mengenakan harga berpatutan sekitar RM30 bagi sehelai jersi untuk cucian bahagian hadapan dan belakang walaupun ada pihak lain mengenakan bayaran lebih tinggi daripadanya.

Katanya, keikhlasan dan nilai persahabatan dalam melakukan kerja lebih diutamakan berbanding meraih keuntungan semata-mata kerana ia lebih mendatangkan kepuasan peribadi selaku pengumpul jersi.

"Pada awal pembabitannya tidak terfikir ia mampu menjana keuntungan lumayan. Asalnya, saya hanya fikir perkhidmatan ini adalah perkara baharu, di Malaysia."

"Mungkin di luar negara ada yang sudah melakukannya, malahan berkongsi pengalaman di laman sosial seperti YouTube tetapi saya tidak fikir ia bersih sepenuhnya kerana saya sendiri pernah mencuba."

"Setakat ini, tiada pelanggan yang memberikan maklum balas negatif, malahan mereka menghantar baju secara berterusan untuk dicuci. Sehari saya mampu untuk mencuci 10 helai jersi tetapi bergantung kepada mood dan kerosakan."

"Apabila ada kelapangan saya akan memberikan tumpuan sepenuhnya kerana saya juga terbabit dengan beberapa tugas luar."

"Jika membabitkan penggunaan bahan kimia, saya terpaksa memperlakukan proses cucian demi menjaga kesihatan dan keselamatan," katanya.

Beliau berkata, kemahiran dan minat mendalam diperlukan terutama bagi mereka yang mahu mencebur terhadap bidang ini, pada masa akan datang.

"Nasihat saya, jika ingin lakukan kerja mencuci jersi, lebih baik bermula dengan pakaian sendiri yang tidak lagi ingin dipakai."

"Proses mencuci perlu dilakukan secara tertib dan menggunakan sarung tangan berkualiti supaya tangan kita tidak mudah tercedera serta topeng muka."

"Selain itu, lebih baik anda belajar dengan mereka yang mahir kerana tidak semua orang mempunyai kebolehan mencuci walaupun menggunakan peralatan atau bahan kimia yang sama."

"Jangan sesekali menggunakan seterika untuk menanggalkan kesan gam pada baju kerana ia akan menyukarkan proses cucian, malahan boleh mengakibatkan kerosakan lebih parah," katanya.

 **malaysiafootballcollection**

 **Sahrin Rain**



Jersi Sahrin ditandatangani Zainal Abdin Hassan



(Kiri) Bersama Shahril Arsat



Seruan kepada penjawat awam

# Jangan diulit kejayaan lalu, tingkat kualiti perkhidmatan



OLEH NORHAYATI UMOR

**KUALA LANGAT** - Dato' Menteri Besar, Amirudin Shari, mahu semua penjawat awam tidak terus diulit dengan kejayaan lampau, sebaliknya komited mencipta lebih banyak kejayaan, pada masa akan datang.

Beliau berkata, usaha mengembang ke arah itu mampu direalisasikan apabila kakitangan menambah baik kualiti perkhidmatan sedia ada.

"Beberapa elemen perlu ditingkatkan antaranya menukar cogan kata daripada melaksanakan tugas kepada amanah.

"Ini adalah anjakan besar seorang penjawat awam kerana perlu menanam sifat berkenaan dengan bertanggungjawab dan bersungguh-sungguh.

"Penjawat awam juga perlu memastikan perubahan dengan berkongsi kepandaian, melebarkan suasana negatif kepada positif ke arah membakar semangat lebih baik antara satu sama lain," katanya.

Beliau berkata demikian pada Majlis Penghargaan Media dan Anugerah Perkhidmatan Cemerlang Majlis Daerah Kuala Langat (MDKL) 2018, di Galeri Jualan, Bandar Rimbuayu, di sini, pada 15 Mac lalu.

Hadir sama, Yang Dipertua

MDKL, Mohamad Zain A Hamid.

Pada masa sama, Amirudin berkata, seramai 34 kakitangan menerima Anugerah Perkhidmatan Cemerlang dan dua pesara itu dapat menjadi pembakar semangat kakitangan lain.

"Dengan pencapaian cemerlang ditunjukkan warga kerjanya, pastinya kejayaan ini dikecap berdasarkan kejayaan lampau dan boleh menjadi contoh kepada kakitangan lain.

"Saya percaya, dengan kepimpinan tradisi yang ditunjukkan sejak 10 tahun lalu dalam melaksanakan tugas tanpa politik keterlaluan, pasti membawa kejayaan positif," katanya.

## MBPJ lancar PJ Smart Centre

**PETALING JAYA** - Selaras dengan usaha Kerajaan Negeri membangunkan Smart Selangor yang peduli, Majlis Bandaraya Petaling Jaya (MBPJ) mengambil satu langkah terkedepan dengan memulakan projek PJ Smart City dan membangunkan PJ Smart Centre ke arah menggalakkan perkembangan *knowledge economy*.

Datuk Bandarnya, Mohd Azizi Mohd Zain berkata, ia dilaksanakan melalui pembangunan Infrastruktur Pintar (*Smart Infrastructure*), Membangun Smart People dan mewujudkan Kerajaan Pintar (*Smart Government*).

Katanya, PJ Smart Centre adalah pusat data MBPJ bagi mengurus dan memantau bandar raya Petaling Jaya dengan lebih cekap melalui landasan penyimpanan dan pemprosesan data bersepadan dengan menggunakan data-data digitalnya yang dianalisa secara *automated*'

"Ia juga adalah lambang ke arah pengurusan data yang sistematis.

"Fungsi PJ Smart Centre dalam menghasilkan pelaporan bagi setiap papan pemuka (*dashboard*) yang dibangunkan di *mini smart centre* dalam membantu MBPJ membuat sesuatu keputusan dalam perancangan dan pengurusan bandar raya Petaling Jaya.

"Data yang dihasilkan di *mini smart centre* akan dipaparkan dan dipantau pusat data PJ Smart Centre," katanya pada pelancaran PJ Smart Centre, pada 14 Mac lalu.

Mohd Azizi berkata, MBPJ sebelum ini membangunkan sebanyak tiga *mini smart centre* yang mula beroperasi di Jabatan Perancangan Pembangunan, Penguat Kuasa dan Unit Komunikasi Korporat (Seksyen Aduan Awam).

"MBPJ turut bercadang untuk membangunkan 10 *mini smart centre* lagi di jabatan lain, pada tahun ini.

"Ia bagi memastikan penduduk Petaling Jaya menyokong dan turut terbabit dalam pelaksanaan PJ Smart City, MBPJ bercadang mem-

bangunkan *mini smart centre* di kawasan kejiranan, sekitar Petaling Jaya," katanya.

Pada masa sama, katanya, pelaksanaan projek PJ Smart City adalah penyelesaian bersepadan *integrated solution* menggunakan landasan Sistem Maklumat Geografi (GIS) sebagai asas pembangunan aplikasi dalam mengurus bandar raya Petaling Jaya secara pintar, mampan dan berdaya tahan.

Beliau berkata, sebanyak 64 *dashboard* dibangunkan yang merangkumi lima sektor utama perkhidmatan MBPJ.

"Antaranya, Perancangan dan Pembangunan Bandar (*City Planning & Development*), Pembangunan Komuniti Bandar (*City Community Development*), Perniagaan Bandar (*City Business*), Pengurusan Bandar dan Penguatkuasaan (*City Management & Enforcement*) dan Perkhidmatan Bandar Raya (*City Town Services*)," katanya.



## MBSA terima kunjungan delegasi Kota Mataram

**SHAH ALAM** - Majlis Bandaraya Shah Alam (MBSA) menerima lawatan dari Delegasi Pemerintah Kota Mataram, Indonesia, pada 9 Mac lalu.

Ketua Bahagian Korporat dan Perhubungan Awam, Shahrin Ahmad berkata, seramai 18 delegasi dari Kota Mataram turut sama menyertai lawatan itu yang diketuai Wali Kota Mataram, Ahyar Abdur Abdul Hanan.

Katanya, lawatan julung kali itu disusuli dengan Majlis Menandatangani Surat Hasrat Kerjasama antara MBSA dan Pemerintah Kota Mataram.

"Kerjasama ini menyaksikan jalinan yang dipersetujui kedua pihak dalam bentuk pertukaran ilmu dan kapakaran, penyelidikan serta aktiviti yang merangkumi bidang seperti tadbir urus, perancangan bandar, pembangunan sumber manusia, pelancongan dan kebudayaan."

"Kerjasama dua hala ini bukan sahaja dapat memperkasakan hubungan dua bandar, tetapi ia antara inisiatif MBSA menjadikan Shah Alam sebuah bandar raya bertaraf dunia," katanya dalam kenyataan.

Terdahulu, pertemuan dan perbincangan di MBSA itu diadakan oleh Timbalan Datuk Bandar MBSA, Mohd Rashidi dan turut disertai Pengarah Jabatan MBSA antaranya Jabatan Pelepasan, Jabatan Khidmat Pengurusan, Jabatan Pembangunan Komuniti, Jabatan Bangunan, Jabatan Kejuruteraan dan Jabatan Perancangan.

Sebelum ini, MBSA juga sering menerima kunjungan daripada delegasi antarabangsa, Pihak Berkua Tempatan, agensi dan jabatan bagi mendapatkan maklumat berhubung perkhidmatan yang ada serta penambahbaikan dilaksanakan pihaknya.



Pemenang Anugerah Penghargaan Media dan Perkhidmatan Cemerlang MDKL

**MDKL jadi tumpuan pelabur asing**

# Perlu sedia terima limpahan kemajuan

OLEH NORHAYATI UMOR

**KUALA LANGAT** - Majlis Daerah Kuala Langat (MDKL) perlu bersedia menerima limpahan kemajuan di kawasan pentadbirannya, dari masa ke masa.

Dato' Menteri Besar, Amirudin Shari berkata, hal itu kerana ketika ini kawasan pentadbiran MDKL mempunyai pembangunan besar daripada beberapa pemasukan gergasi.

Katanya, selain pembangunan pesat, daerah berkenaan juga sedang menjadi tumpuan pelabur asing dan tempatan yang mampu menjana pendapatan berbilion ringgit.

"Sejak beberapa tahun kebelakangan ini, daerah ini menerima pelbagai pembangunan dan menjana pendapatan melebihi sasaran."

**AMIRUDIN SHARI**  
Dato' Menteri Besar

khidmatan Cemerlang Majlis Daerah Kuala Langat (MDKL) 2018, di Galeri Jualan, Bandar Rimbayu, di sini, pada 15 Mac lalu.

Hadir sama, Yang Dipertua MDKL, Mohamad Zain A Hamid.

Pada masa sama, Amirudin berkata, cabaran bagi menghadapi limpahan pembangunan dan kemajuan itu perlu digalas semua pihak walaupun berdepan dengan pelbagai cabaran, akan datang.

"Sudah tentu limpahan ini bukan hanya sekadar perubahan kemudahan tetapi membabitkan sosial budaya masyarakat keseluruhannya."

Justeru, dengan perkembangan yang berlaku ini, saya yakin warga kerja MDKL mampu memikul tugas dengan sebaiknya dan menjadikan Kuala Langat sebagai majlis perbandaran yang menjadi contoh kepada Pihak Berkuasa Tempatan lain," katanya.

Beliau berkata demikian pada Majlis Penghargaan Media dan Anugerah Per-

## Kilang kitar semula plastik tanpa lesen disita

**HULU SELANGOR** - Sebuah kilang kitar semula plastik import di Kawasan Perindustrian Zuhrah, disita Majlis Daerah Hulu Selangor (MDHS) kerana beroperasi tanpa lesen.

Yang Dipertua MDHS, Shukri Mohamad Hamin berkata, pengusaha kilang terbabit masih belum mendapatkan sokongan daripada Jabatan Alam Sekitar untuk menjalankan operasi selepas gagal mengemukakan laporan Kajian Impak Alam Sekitar seperti yang diperlukan.

"Hasil pemantauan MDHS mendapati kilang ini masih meneruskan operasi walaupun notis memberhentikan aktiviti perniagaan dikeluarkan Jabatan Penguatkuasaan, pada 17 Januari lalu.

"Tindakan penyitaan dilakukan ekoran kegagalan syarikat terbabit mematuhi peraturan untuk memberhentikan aktiviti perniagaan."

"Tindakan ini tertakluk di bawah Undang-Undang Kecil 38(1), Undang-Undang Kecil Prelesenan Tred, Perniagaan dan Perindustrian (MDHS) 2007, yang membolehkan pihak berkuasa tempatan menyita apa-apa barang boleh alih yang berkaitan dengan kesalahan yang dilakukan di lokasi yang dinyatakan," katanya.

Beliau berkata demikian selepas mengetuai operasi selama satu jam, di kilang terbabit, di sini, pada 14 Mac lalu.

Ketika operasi dijalankan, tiada wakil syarikat berada di kawasan berkenaan dan hanya terdapat hasil pemprosesan plastik, mesin serta jentera.

Turut serta dalam operasi itu ialah EXCO Kerajaan Tempatan, Pengangkutan Awam dan Pembangunan Kampung Baru, Ng Sze Han; EXCO Alam Sekitar, Teknologi Hijau, Sains, Teknologi dan Inovasi dan Hal Eh-



wal Pengguna, Hee Loy Sian dan Ahli Dewan Negeri Kuala Kubu Bharu, Lee Kee Hiong.

Dalam operasi itu, MDHS terpaksa memecahkan pintu utama pejabat yang dikunci bagi menyita beberapa aset milik kilang terbabit, iaitu empat fork-lift, komputer CCTV (satu unit), tiga walkie-talkie dan satu unit tong gas serta kipas.


Turut dirampas water jet (satu), pemecah konkrit (satu), gergaji rantai (satu), pemotong besi (satu), pemotong (tiga) serta dua troli hidraulik.

Shukri berkata, pengusaha mempunyai tempoh sebulan untuk menuntut semua barang dengan syarat memindahkan operasi dari Hulu Selangor dan jika gagal, tindakan pendakwaan di mahkamah akan diambil secepat mungkin.

"Jika ada ruang, kita juga akan mengambil tindakan terhadap syarikat yang menyewakan premis ini."

"Jika disabitkan kesalahan, pengusaha boleh dikenakan denda RM500,000 serta penjara," katanya.

Secara keseluruhan, terdapat hampir 10 kilang mengusahakan aktiviti kitar semula plastik dengan empat daripadanya mempunyai lesen import, di sekitar daerah Hulu Selangor.



**SMART SELANGOR  
DELIVERY UNIT**

**SSDU Innovations Sdn Bhd** (1272131-K)

Milikan penuh Menteri Besar Selangor (Pemerbadanan)(MBI)

Smart Selangor Delivery Unit (SSDU) adalah sebuah anak syarikat milikan penuh Kerajaan Negeri Selangor yang dimandatkan sebagai badan induk pelaksana program Smart Selangor. Kami mempelawa syarikat yang berkelayakan untuk menyertai 'Expression of Interest' untuk Projek Smart Selangor.

### SYARIKAT UNTUK PROJEK SMART SELANGOR

Pemohon yang berminat mestilah memiliki penyelesaian (atau sistem) inovatif yang telah berjaya dilaksanakan serta berpengalaman luas di dalam pelaksanaan inisiatif Bandar Pintar (Smart City).

Pemohon boleh mendapatkan E-dokumen 'Expression of Interest' berharga RM50.00 (secara tunai SAHAJA) daripada pejabat Smart Selangor Delivery Unit, Tingkat 15, Plaza Perangsang, Persiaran Perbandaran, 40000 Shah Alam, Selangor dari **26hb Mac 2019 hingga 5hb April 2019** pada waktu pejabat (9:30 pagi - 5:00 petang).

Pemohon MESTILAH menghantar kertas cadangan dan maklumat yang berkenaan di dalam format softcopy, menggunakan peranti yang dibekalkan semasa pembelian E-dokumen 'Expression of Interest'. Sila hantar dokumen tersebut ke alamat di atas pada atau sebelum **12:00 tengah hari pada 12hb April 2019**.



Bukan pengajian kelas dua

# TVET dirangka lebih kondusif

OLEH NORHAYATI UMOR

**SERDANG** - Bidang pendidikan teknikal dan latihan vokasional (TVET) kini dirangka dengan lebih kondusif bagi memberi peluang kepada lepasan pelajar mencipta pendapat lumayan.

Dato' Menteri Besar, Amirudin Shari berkata, semua pihak khususnya ibu bapa perlu mengubah persepsi terhadap bidang itu kerana ia bukan lagi pengajian kedua.

"Saya baru selesai melawat ke beberapa daerah dan institusi di Jerman dan Switzerland untuk melihat bagaimana Selangor boleh memberi nilai tambah dalam menyediakan latihan seperti ne-

gara itu.

"Kita mahu bidang ini memberi manfaat sepenuhnya kepada rakyat Selangor kerana bidang ini bukan lagi peluang kedua bagi pelajar yang tercicir, sebaliknya ia menawarkan masa depan cerah," katanya.

Beliau berkata demikian pada Majlis Perasmian Selangor Mega Job Fair 2018, di MAEPS, di sini, pada 16 Mac lalu.

Mengulas penganjuran program itu, Amirudin berkata, situasi politik yang stabil di peringkat Persekutuan dan Negeri membolehkan pihaknya menerima penyertaan daripada 180 syarikat yang menawarkan 11,000 peluang pekerjaan.

Beliau percaya tawaran yang dike-

luarkan pada acaara itu bukan sahaja perkhidmatan sokongan, malahan juga profesional yang menawarkan pendapatan lumayan kepada bakal pekerja.

"Dunia pekerjaan ketika ini tidak seperti masa lampau. Masa kini banyak perubahan besar yang berlaku menuntut semua pihak lebih bersedia.

"Sebagai contoh cabaran Revolusi Perindustrian 4.0 menuntut kita lebih positif, oleh itu jangan bimbang atau takut.

"Kerajaan Negeri akan membuka lebih peluang menyusuri ruang ini bagi meningkatkan kualiti mahasiswa atau kakitangan awam juga swasta bagi berdepan revolusi ini," katanya.



## Amal baca Yasin selepas Subuh

**KLANG** - Salah seorang pelajar cemerlang yang mencatatkan keputusan 11 A+ dalam Sijil Pelajaran Malaysia (SPM) 2018, mengamalkan bacaan Yasin setiap hari, selepas solat Subuh.

Pelajar Kolej Islam Sultan Alam Shah (KISAS), Raudhah Saifulzaman, 18, berkata inisiatif itu diambilnya sendiri bersama dengan rakan yang lain.

"Sejak mengamalkan bacaan Yasin, kami berasa lebih tenang ketika belajar dan lebih seronok mengulang kaji pelajaran.

"Satu lagi perkara yang saya boleh kongsikan ialah walaupun sibuk mengulang kaji pelajaran, saya tetap berusaha memperbaikkan ibadah," katanya kepada SelangorKini pada Majlis Anugerah Kecemerlangan SPM 2018, di Kl-

SAS, pada 14 Mac lalu.

Bercita-cita menjadi seorang aktaun, Raudhah berkata, perkongsian ilmu bersama rakannya juga menjadi salah satu tips untuk meraih kejayaan.

"Apabila lebih banyak ilmu dikongsi dengan orang lain, saya yakin ilmu sedia ada pada kita akan lebih berkembang," katanya.

Beliau yang juga anak keenam daripada sembilan adik beradik itu juga menjadikan kakaknya sebagai idola.

"Semua kakak saya juga cemerlang dalam pelajaran masing-masing. Sehingga kini, ada yang belajar di Maghribi serta meneruskan pembelajaran dalam bidang syariah.

"Saya berharap kami semua



membanggakan kedua ibu bapa dan kejayaan ini akan diteruskan oleh tiga lagi adik saya yang lain," katanya.

## 1,510 calon SPM di Selangor semua A

**SHAH ALAM** - Seramai 1,510 calon peperiksaan Sijil Pelajaran Malaysia (SPM) 2018 berjaya memperoleh keputusan cemerlang gred A+, A dan A- dalam semua mata pelajaran diduduki.

Pengarah Jabatan Pendidikan Selangor, Mohd Salleh Mohd Kassim berkata, negeri itu mencatatkan peningkatan dengan peratusan gred cemerlang 2.34 peratus, berbanding 2.22 peratus, pada 2017.

"Ini menunjukkan kualiti pencapaian calon yang mendapat keputusan termasuk cemerlang tertinggi, cemerlang dan kepujian dalam mata pelajaran yang diambil adalah membanggakan," katanya dalam kenyataan.

Katanya, jumlah calon SPM 2018 di negeri ini yang layak mendapat sijil adalah seramai 54,093 calon, berbanding 57,313 calon, pada 2017.

Bagaimanapun, Mohd Salleh berkata, bilangan calon yang layak mendapat sijil meningkat 0.21 peratus, berbanding tahun sebelumnya.

"Sementara itu, Gred Purata Negeri pada SPM kali ini meningkat 0.03 peratus, sekali gus mencatatkan pencapaian terbaik, dalam tempoh tiga tahun," katanya.

Peperiksaan bertulis SPM pada 2018 bermula 13 November hingga 13 Disember tahun lalu dengan bilangan calon 65,549, di negeri itu.

**KLANG** - Seorang pelajar yang menghafaz al-Quran dari Kolej Islam Sultan Alam Shah (KISAS) menjadi salah seorang pelajar yang meraih keputusan cemerlang dalam Sijil Peperiksaan Malaysia (SPM) 2018 yang diumumkan, pada 14 Mac lalu.

Muhammad Aleef Dahlan, 18, memperoleh gred A dalam

## Huffaz cemerlang 11A

semua 11 mata pelajaran, sekali gus menjadikan huffaz itu antara 1,510 calon SPM cemerlang, di Selangor.

Beliau memperoleh keputusan cemerlang tertinggi (A+) dalam mata pelajaran Bahasa Melayu; Sejarah; Matematik; Pendidikan Al-Quran dan Sunnah; Pendidikan Syariah Islamiah dan Bahasa Arab.



Sementara keputusan cemerlang tinggi (A) untuk subjek Biologi; Kimia dan Matematik Tambahan.

Anak ketiga daripada enam beradik itu berkata, tempoh masa 24 jam sehari yang dikurniakan ALLAH SWT dibahagikan sebaik mungkin untuk membolehkannya mencapai kejayaan.

"Jika diikutkan, mungkin ada yang menganggap bila masanya hendak menghafal al-Quran dan bila pula waktunya hendak belajar, namun pada saya waktu yang diberikan ALLAH SWT amat mencukupi jika dibahagikan dengan sebaik mungkin.

"Saya juga menggunakan setiap masa lapang untuk mengulang kaji pelajaran dan masa terbaik ialah sebelum tidur, setiap malam," katanya kepada Selangor-

Kini pada Majlis Anugerah Kecemerlangan SPM 2018, di KISAS.

Muhammad Aleef yang bercita-cita sebagai jurutera turut gembira apabila kedua-dua ibu-bapanya hadir ke majlis berkenaan.

"Terima kasih kepada emak dan ayah yang tidak henti-henti memberi sokongan kepada saya sehingga mencapai keputusan sebegini, saya amat terharu," katanya.

Sementara itu, bapanya, Dahlan Husin, 49, berkata semua anaknya sentiasa diberi kata kunci iaitu 'usaha tangga kejayaan'.

"Itulah kata-kata saya kepada mereka. Walaupun begitu, sekutu mana kita berusaha, saya juga berpesan kepadanya, arahan ALLAH SWT jangan sesekali kita lupa.

"Jika ada kesusahan atau kesukaran, mengadulah kepada ALLAH SWT," katanya.

**Fitnah dilempar kecam kerajaan**

# Tolak dakwaan pinggir Islam

OLEH NORHAYATI UMOR

**BATU CAVES** - Dato' Menteri Besar, Amirudin Shari, menolak dakwaan bahawa kerajaan ketika ini tidak mempedulikan masyarakat beragama Islam.

Sebaliknya, beliau berkata, fitnah yang dilemparkan itu hanya bertujuan untuk mengcam kerajaan di era Malaysia baharu ini.

"Bila ada yang menghina Nabi Muhammad SAW, kata kita tidak ambil tindakan, sedangkan kerajaan mengambil tindakan pantas menahan suspek tidak sampai seminggu."

"Manakala, dakwaan di mahkamah pula diambil tidak sampai tiga minggu, namun fakta palsu pula

berte-baran mengatakan kita dikawal oleh bukan Islam sehingga lupa peranan sebagai umat Islam," katanya.

Beliau berkata demikian pada program Santai Dato' Menteri Besar bersama penduduk dan penyerahan IPR di Dewan MPKK, Kampung Melayu Batu Caves, di sini, pada 15 Mac lalu.

Amirudin berkata, kerajaan bukan sahaja prihatin terhadap rakyatnya, malah mengekalkan pentadbiran bersih dan berintegriti.

"Kita tidak mahu ulang kisah pentadbiran lalu yang jelas terbukti dengan puluhan kes di mahkamah."

Dakwaan itu sedang dibuat, namun pihak didakwa sedang cuba menangguhkannya dengan pelbagai

cara, kita tidak kejam dan mengikut prosedur," katanya.

Sehubungan itu, beliau mahu rakyat membuka mata dan melihat perkara positif yang dilaksanakan serta mendapatkan maklumat sahih sebelum mengeluarkan sebarang bentuk kecaman.

"Rakyat juga perlu tahu mengawal penggunaan teknologi masa kini supaya tidak memudaratkan diri sendiri," katanya.

Pada 5 Mac lalu, Ketua Polis Negara, Tan Sri Mohamad Fuzi Harun berkata, polis sudah menerima 929 laporan berhubung kes penghinaan terhadap Islam, Nabi Muhammad serta isteri baginda, Saidatina Aisyah, di seluruh negara.

## Bendung gejala tidak bermoral

**SHAH ALAM** - Ahli kariah masjid dan surau di seluruh negeri diseru membantu membendung kegiatan tidak bermoral, di kawasan masing-masing.

Seruan itu disampaikan Dato' Menteri Besar, Amirudin Shari, ketika merasmikan Konvensyen Melestari Pengurusan Masjid dan Surau Selangor, di Auditorium Dewan Jubli Perak, Bangunan Sultan Salahuddin Abdul Aziz Shah, di sini, pada 16 Mac lalu.

"Menjadi golongan yang ikhlas dalam melaksanakan segala amal maafur dan kebajikan demi menjun-

jung prinsip yang ditegaskan Allah SWT dalam surah al-Baqarah ayat 148 *fastabiqul khairat* yang memberi maksud "Maka berlumba-lumbalah kamu dalam berbuat kebaikan".

"Bagi tujuan itu, jawatankuasa kariah perlu bertanggungjawab dengan kelakuan ahli kariah berhubung agama Islam seperti membendung aktiviti tidak bermoral dan memastikan tiada pelanggaran undang-undang syariah dalam kariah masing-masing," katanya.

Amirudin turut menggesa supaya institusi masjid dan surau mela-

hirkan *ummatan wasata* iaitu umat yang cemerlang tetapi mengamalkan prinsip kesederhanaan dalam kehidupan mereka.

Katanya, institusi masjid dan surau juga perlu membingkai muaafakat dalam kalangan ummah selain melahirkan masyarakat yang berpegang teguh kepada dasar akidah Ahli Sunnah Wal Jamaah.

"Pegawai masjid juga hendaklah menjauhi sikap ekstrem dalam tindak tanduk, angkuh dan sompong," katanya.



## Konvensyen perkasa masjid, surau

**SHAH ALAM** - Kerajaan Negeri mengajurkan Konvensyen Melestari Pengurusan Masjid dan Surau Negeri Selangor bagi memperkasa urus tadbir kedua-dua institusi itu.

Dato' Menteri Besar, Amirudin Shari berkata, konvensyen itu menepati hasrat kerajaan dan hala tuju kita ke arah membudayakan pengurusan masjid serta surau yang berintegriti, lestari juga efisien.

"Saya juga ingin merakamkan ucapan tahniah kepada sekalian nazir dan pegawai masjid yang dilantik untuk sesi 2019-2021," katanya.

Beliau berkata demikian ketika merasmikan konvensyen itu, di Au-

ditorium Dewan Jubli Perak, Bangunan Sultan Salahuddin Abdul Aziz Shah, di sini, pada 16 Mac lalu.

Pada konvensyen itu, Amirudin turut menyampaikan watikah pe-lantikan kepada 1,900 penerima bagi masjid seluruh negeri.

Konvensyen itu juga adalah program anjuran bersama Jabatan Agama Islam Selangor dan Majlis Agama Islam Selangor.

## Institusi Islam medium pembangunan ummah

**SHAH ALAM** - Jawatankuasa masjid dan surau perlu komited serta fokus mengurus kedua-dua institusi itu bagi mengangkatnya sebagai medium pembangunan ummah.

Dato' Mentari Besar, Amirudin Shari berkata, bagi tujuan itu, masjid dan surau perlu peka dengan tanggungjawab sosial, menggunakan kemudahan berteknologi tinggi dan meningkatkan prasarana.

Katanya, masjid dan surau juga mesti berdam-ping dengan masyarakat, ahli kariah dan menyantuni golongan kurang upaya.

"Seterusnya, masjid surau wajar guna teknologi *High-End* untuk berkomunikasi dengan ahli kariah dan pengurusan.

"Kemudahan dan prasarana masjid perlu dipertingkat, sekali gus menggalas fungsi sebagai pusat komuniti setempat serta pusat riadah," katanya.

Beliau berkata demikian ketika merasmikan program Konvensyen Melestari Pengurusan Masjid dan Surau Negeri Selangor, di Auditorium Dewan Jubli Perak, Bangunan Sultan Salahuddin Abdul Aziz Shah, di sini, pada 16 Mac lalu.

Pada masa sama, Amirudin berkata, pegawai masjid dan surau perlu bersabar dalam menguruskan perbezaan pandangan dalam kalangan ahli kariah.

Terdahulu, Kerajaan Negeri dalam Belanjawan 2019 meluluskan peruntukan RM1 juta bagi menaik taraf 10 masjid.

## WAKTU SOLAT SELANGOR

**21 - 27 MAC 2019**  
14 - 20 REJAB 1440H



Gombak, Hulu Selangor, Rawang, Hulu Langat, Sepang, Petaling dan Shah Alam

|           | Imsak | Subuh | Syuru' | Zuhur | Asar | Maghrib | Isyak |
|-----------|-------|-------|--------|-------|------|---------|-------|
| 21 Khamis | 5:52  | 6:02  | 7:16   | 1:23  | 4:29 | 7:26    | 8:35  |
| 22 Jumaat | 5:52  | 6:02  | 7:15   | 1:23  | 4:28 | 7:25    | 8:34  |
| 23 Sabtu  | 5:51  | 6:01  | 7:15   | 1:23  | 4:27 | 7:25    | 8:34  |
| 24 Ahad   | 5:51  | 6:01  | 7:15   | 1:22  | 4:26 | 7:25    | 8:34  |
| 25 Isnin  | 5:50  | 6:00  | 7:14   | 1:22  | 4:25 | 7:25    | 8:34  |
| 26 Selasa | 5:50  | 6:00  | 7:14   | 1:22  | 4:24 | 7:25    | 8:34  |
| 27 Rabu   | 5:50  | 6:00  | 7:14   | 1:22  | 4:23 | 7:25    | 8:33  |

Sabak Bernam dan Kuala Selangor

|           | Imsak | Subuh | Syuru' | Zuhur | Asar | Maghrib | Isyak |
|-----------|-------|-------|--------|-------|------|---------|-------|
| 21 Khamis | 5:55  | 6:05  | 7:18   | 1:26  | 4:32 | 7:28    | 8:37  |
| 22 Jumaat | 5:54  | 6:04  | 7:17   | 1:26  | 4:31 | 7:28    | 8:37  |
| 23 Sabtu  | 5:54  | 6:04  | 7:17   | 1:25  | 4:30 | 7:28    | 8:37  |
| 24 Ahad   | 5:54  | 6:04  | 7:16   | 1:25  | 4:29 | 7:28    | 8:37  |
| 25 Isnin  | 5:53  | 6:03  | 7:16   | 1:25  | 4:28 | 7:28    | 8:37  |
| 26 Selasa | 5:53  | 6:03  | 7:16   | 1:25  | 4:27 | 7:27    | 8:36  |
| 27 Rabu   | 5:52  | 6:02  | 7:15   | 1:24  | 4:26 | 7:27    | 8:36  |

Klang dan Kuala Langat

|           | Imsak | Subuh | Syuru' | Zuhur | Asar | Maghrib | Isyak |
|-----------|-------|-------|--------|-------|------|---------|-------|
| 21 Khamis | 5:53  | 6:03  | 7:17   | 1:24  | 4:29 | 7:26    | 8:35  |
| 22 Jumaat | 5:52  | 6:02  | 7:16   | 1:24  | 4:28 | 7:26    | 8:35  |
| 23 Sabtu  | 5:52  | 6:02  | 7:16   | 1:23  | 4:27 | 7:26    | 8:35  |
| 24 Ahad   | 5:52  | 6:02  | 7:16   | 1:23  | 4:26 | 7:26    | 8:34  |
| 25 Isnin  | 5:51  | 6:01  | 7:15   | 1:23  | 4:25 | 7:25    | 8:34  |
| 26 Selasa | 5:51  | 6:01  | 7:15   | 1:22  | 4:24 | 7:25    | 8:34  |
| 27 Rabu   | 5:50  | 6:00  | 7:15   | 1:22  | 4:23 | 7:25    | 8:34  |



Era Malaysia baru

# Angkat wanita setiap peringkat

OLEH NORHAYATI UMOR

**SHAH ALAM** - Keupayaan sesebuah negara mencapai setiap sasaran dalam Matlamat Pembangunan Mampan memerlukan kerelihan semua pihak.

Isteri Dato' Menteri Besar, Masdiana Muhamad percaya era Malaysia Baharu ketika ini mengangkat kaum wanita, di setiap peringkat.

Justeru, katanya, golongan wanita adalah pemegang taruh terpenting dalam menjayakan agenda berkenaan.

Beliau berkata, pembabitan wanita dalam kepimpinan di Malaysia adalah sangat signifikan dan perlu diberikan tempat dalam pentadbiran setiap organisasi.

"Hal ini supaya setiap dasar, polisi dan keputusan yang dibuat akan menjadi lebih inklusif dan peka terhadap kehendak setiap golongan masyarakat."

"Malaysia pada hari ini menempa sejarah dengan menobatkan Timbalan Perdana Menteri pertama wanita iaitu Datuk Seri Dr Wan Azizah Wan Ismail," katanya.

Beliau berkata demikian di Majlis Apre-



Masdiana bersama pimpinan wanita lain

siasi Kepimpinan Wanita Selangor, di Pusat Konvensyen Shah Alam, di sini, pada 15 Mac lalu.

Masdiana berkata, penyertaan wan-

ta dalam setiap lapis kepimpinan negara menambah variasi dan kepelbagaiannya yang bakal menatiahkan hasil positif dalam meningkatkan produktiviti.

"Memandangkan wanita itu sendiri sememangnya memiliki peranan semula jadi yang pelbagai iaitu seorang ibu, isteri, anak, malahan seorang nenek."

"Maka, sudah tentulah peranan semula jadi yang pelbagai ini membentuk dinamika berbeza yang menjadi nilai tambah kepada setiap organisasi sedia ada seperti nilai empati, peduli dan bersifat rahmah," katanya.

Pada masa sama, beliau yang juga Yang Dipertua Pertubuhan Kebajikan dan Amal Wanita Selangor (PEKAWANIS) berharap Kerajaan Negeri turut memperkuatkkan program yang dilaksanakan menerusi Institut Wanita Berdaya dan Pusat Wanita Berdaya.

"Saya amat berharap agensi ini terus menjadi landasan utama wanita di Selangor untuk mendapatkan latihan pengupayaan, baik dari aspek kepimpinan, pembinaan kapasiti maupun kemahiran asas."

"Ia sebagai persediaan untuk mereka ini diangkat ke tahap yang lebih tinggi, menjadi pemimpin di peringkat komuniti, daerah juga negeri," katanya.

## Kerajaan Negeri komited beri sokongan

**SHAH ALAM** - Kerajaan Negeri terus komited dalam usaha memberi sokongan dan memberdaya golo-

ngan wanita, di negeri itu.

EXCO Kesihatan, Kebajikan, Pemberdayaan Wanita dan Keluarga, Dr Siti Mariah Mahmud berkata, dasar proaktif Kerajaan Negeri dalam pemberdayaan wanita adalah tonggak penting dalam agenda mempercepatkan pembabitan sebagai pembuat keputusan, di Malaysia.

"Justeru, di Selangor, kita me-war-warkan kepada setiap premis pekerjaan di negeri ini untuk menyediakan fasiliti mesra wanita.

"Antaranya, bangunan SUK yang terlebih dahulu menunjukkan teladan dengan menyediakan fasiliti mesra wanita seperti Parkir Ibu Hamil, Bilik Laktasi dan taska.

"Saya berharap supaya bang-

unan kerajaan yang lain, mala-

han premis kerja milik badan kor-

porat juga dapat menyusul langkah ini," katanya.

Beliau berkata demikian ketika Majlis Apresiasi Kepimpinan Wanita Selangor, di Pusat Konvensyen Shah Alam, di sini, pada 15 Mac lalu.

Hadir sama, Isteri Dato' Menteri Besar, Masdiana Muhamad; EXCO Pembangunan Usahawan serta Pembangunan Luar Bandar, Desa dan Kampung Tradisi, Rodziah Ismail dan Pengurus Institut Wanita Berdaya, Dr Daroyah Alwi.

Turut hadir, Menteri Perumahan dan Kerajaan Tempatan, Zuraida Kamardin.

Pada masa sama, Dr Mariah ber-

kata, Kerajaan Negeri memberi perhatian serius kepada golongan wanita daripada aspek keselamatan diri dan keluarga.

Katanya, inisiatif itu dilaksanakan dengan kerjasama Institut Wanita Berdaya dengan melancarkan kempen #dengarsuarakami bagi memberi kesedaran dan informasi kepada wanita berkenaan jenayah yang berlaku di sekitar.

"Selain itu, kempen ini juga disambut oleh Pusat Wanita Berdaya (PWB) di setiap DUN dengan setiap PWB ini menyusun satu program Wanita Anti Jenayah dengan menganjurkan bengkel seni pertahanan diri, di peringkat komuniti," katanya.

Justeru, ia bagi memeliha-



## Hawa perlu sistem dukungan ampuh

**SHAH ALAM** - Golongan hawa perlu terus memperjuangkan hak mendapatkan sistem sokongan ampuh supaya sentiasa efisien di tempat kerja, sekali gus menyumbang ke arah produktiviti negara.

EXCO Kesihatan, Kebajikan, Pemberdayaan Wanita dan Keluarga, Dr Siti Mariah Mahmud berkata, daripada kaca mata strategi keutamaan atau *strategic priority*, menjadi hasrat Kerajaan Negeri memastikan segala dasar dan tindakan dilaksanakan secara bersepadu serta menyeluruh.

Katanya, ia bagi memeliha-

ra kepentingan wanita dalam semua aspek kehidupan termasuk sistem ekonomi, kesihatan, pendidikan, keselamatan dan hak serta kehormatan diri mereka di-

lindungi dalam kerangka perundangan.

"Pendekatan ini juga seja-

jar komitmen negara, di bawah Sustainable Development Goals (SDG).

"Menurut perangkaan pada 2017, indeks kesejahteraan Ma-

laysia meningkat 1.9 peratus se-

pada 15 Mac lalu.

Bagaimanapun, Dr Mariah ber-

kata, banyak cabaran perlu diha-

dapi dalam mencapai matlamat

itu, antaranya hampir 70 peratus

responden berdepan diskrimina-

si jantina di tempat kerja dan 41

peratus tidak dinaikkan pangkat

disebabkan jantina.

"Manakala, 30 peratus dari-

padanya wanita Malaysia bersetuju

bahawa anak menjasakan masa

depan kerjaya mereka, sementara

30 peratus lagi percaya anak me-

nyebabkan kerjaya mereka ter-

rantut."

"Bilangan wanita yang ti-

idak kembali ke sektor peker-

jaan selepas berumahtangga

atauselepas mendapat cahaya

mata terus meningkat," katanya.



**4km Fun Run Walk****10km Fun Ride****Sempena Fit Malaysia 2019****MBSA tutup jalan**

OLEH ZAREEF MUZAMMIL

**SHAH ALAM** - Majlis Bandaraya Shah Alam (MBSA) akan menutup sebahagian jalan bagi melancarkan penganjuran program Larian Fit Malaysia 2019 peringkat Negeri Selangor, pada 23 dan 24 Mac ini.

Ketua Bahagian Korporat dan Perhubungan Awamnya, Shahrin Ahmad berkata, penutupan sementara sebahagian jalan itu untuk tujuan persiapan dan semasa program berlangsung.

"Jalan terbabit adalah Persiaran Bandaraya (Dataran Kemerdekaan), pada 21 Mac hingga 25 Mac (Khamis hingga Isnin) mulai jam 6 petang sehingga 12 tengah malam.

"Manakala, Persiaran Bandara (Dataran Kemerdekaan), Persiaran Perbandaran, Persiaran Tasik, Persiaran Damai, Persiaran Kayangan, Persiaran Masjid, Bu-

latan Setiajasa, Bulatan Bestari dan Bulatan Permai, pada 24 Mac ini (Ahad) mulai jam 6.30 sehingga 10 pagi," katanya dalam kenyataaan.

Justeru, katanya, orang ramai diminta supaya tidak menggunakan jalan seperti dinyatakan pada tempoh berkenaan untuk

mengelakkan kesesakan lalu lintas dan sentiasa mematuhi arahan dari semasa ke semasa yang diberikan MBSA.

"Kita memohon pengguna jalan raya memberikan kerjasama dan menggunakan jalan alternatif untuk menuju ke destinasi yang hendak dituju," katanya.

PENGURUSAN AIR SELANGOR SDN BHD  
(1082296-U)**KENYATAAN TENDER**

| Bil. | NO. TENDER         | KETERANGAN   |
|------|--------------------|--|
| 1.   | AIS/WQLS/T1/3/2019 | SUPPLY AND INSTALL AUTOMATED SECONDARY CHLORINATION SYSTEM (ASCS) AT DISTRIBUTION SYSTEM |

Untuk butiran lanjut mengenai tender di atas, sila layari laman web kami di <https://www.syabas.com.my/business/current-tender#1> atau menyertai saluran Telegram kami di <https://t.me/tenderairselangor> untuk mendapatkan pemberitahuan tentang kemaskini tender kami. Kontraktor/Pembekal yang ingin menyertai tender di atas adalah diwajibkan untuk mendaftar dengan Air Selangor. Emel kelulusan atau sijil pendaftaran kontraktor/pembekal hendaklah dibawa semasa membeli dokumen tender.

**Taklimat KSSB bina kerjasama ADN, penduduk**

Bagi menggalakkan dialog dua hala serta mewujudkan jalinan kerjasama bersama Ahli Dewan Negeri (ADN) Ijok, Dr. Idris Ahmad serta warga daerah Kuala Selangor, Kumpulan Semesta Sdn. Bhd. (KSSB) mengadakan sesi taklimat bersama Dr. Idris, Penghulu dan Ketua Kampung Mukim Bestari Jaya, Ijok serta Pasangan.

Program yang berlangsung di Pejabat Operasi KSSB Cawangan Utara dan dihadiri sekira 33 orang, pada 14 Mac lalu.

KSSB menerangkan berkaitan operasi serta jumlah permit oleh KSSB, di Selangor. Selain itu, KSSB juga menjawab aduan daripada wakil penduduk kampung berhubung jalan kotor dan rosak berdekatan tapak operasi walaupun ia bukan daripada permit syarikat berkenaan.

Pada masa sama, KSSB memberitahu bahawa mereka sudah menjalankan kerja pembersihan jalan Jabatan Kerja Raya (JKR) setiap minggu bagi pihak semua kontraktor perlombongan pasir di kawasan Bestari Jaya hasil persetujuan mesyuarat bersama JKR Kuala Selangor. Bagaimanapun pada awal tahun 2019, KSSB terpaksa menghentikan kerja pen-



cucian jalan akibat tidak mendapat kerjasama daripada kontraktor lain.

Keberadaan KSSB di sekitar penduduk secara tidak langsung menumbuhkan sosio-ekonomi, pembangunan usahawan pasir dan membuka peluang pekerjaan kepada penduduk Kuala Selangor.

Pengurus Kanan Perhubungan Awam dan Hal Ehwal Korporat, Abd Wahab bin Nordin berkata, KSSB juga menyalurkan sumbangan melalui Tanggungjawab Sosial Korporat (CSR) seperti sumbangan ke masjid, sekolah, pusat tafhib dan membantu mangsa kebakaran serta banjir di sekitar kawasan tapak operasi, sejak 2015.

Pada program itu, pihak KSSB turut membawa Dr. Idris, Penghulu dan Ketua Kampung turun padang melawat ke tapak HORAS600 dan tapak operasi, di Kampung Makmur.



ADVERTORIAL

**MAJLIS PERBANDARAN SEPANG**

Persiaran Semarak Api, Cyber 1, 63200 CYBERJAYA, Selangor Darul Ehsan

**KENYATAAN TENDER**

1. Tender adalah dipelawa daripada kontraktor – kontraktor Bumiputera Negeri Selangor yang berdaftar dengan CIDB dan Unit Perancang Ekonomi Negeri (UPEN) bagi kerja – kerja berikut:

| BIL. | NO. TENDER                  | TAJUK KERJA   | BIDANG, SUB BIDANG & PECAHAN BIDANG                          | HARGA DOKUMEN |
|------|-----------------------------|---|--|---------------|
| 1.   | MPSepang (KEJ) 400-10/12-02 | CADANGAN KERJA MENURAP SEMULA JALAN SERTA KERJA BERKAITAN DI JALAN IXORA 1/14, 1/15, 1/16, 1/17, 1/18, 1/19, 1/20, 1/21, 1/22, DAN 1/23, TAMAN IXORA HILL PARK, BANDAR BARU SALAK TINGGI UNTUK MAJLIS PERBANDARAN SEPANG TAHUN 2019.          | CIDB, SPKK,G3 CE21(Kerja-Kerja Am Kejuruteraan), & (UPEN)    | RM 150.00     |
| 2.   | MPSepang (KEJ) 400-10/12-03 | CADANGAN KERJA MENURAP SEMULA JALAN SERTA KERJA BERKAITAN DENGAN KAADAH "MILL AND PAVE" DI SEBAHAGIAN JALAN PERSIARAN BANDAR BARU SALAK TINGGI, BANDAR BARU SALAK TINGGI UNTUK MAJLIS PERBANDARAN SEPANG TAHUN 2019                           | CIDB, SPKK,G3 CE21(Kerja-Kerja Am Kejuruteraan), & (UPEN)    | RM 150.00     |
| 3.   | MPSepang (KEJ) 400-10/12-04 | CADANGAN KERJA MENURAP SEMULA JALAN SERTA KERJA BERKAITAN DI JALAN PP3/1, 3/2, 3/3, 3/4, 3/5, 3/6 DAN 3/7 , TAMAN PUTRA PRIMA, PUCHONG UNTUK MAJLIS PERBANDARAN SEPANG TAHUN 2019   | CIDB, SPKK,G3 CE21(Kerja-Kerja Am Kejuruteraan), & (UPEN)    | RM 150.00     |
| 4.   | MPSepang (KEJ) 400-10/12/05 | CADANGAN KERJA-KERJA PENGGANTIAN KABEL BAWAH TANAH DAN LAMPU AWAM DI JALAN UTAMA TAMAN SEROA DAN JALAN SEROA INDAH, BANDAR BARU SALAK TINGGI UNTUK MAJLIS PERBANDARAN SEPANG PADA TAHUN 2019  | CIDB, SPKK, G3 ATAU G4,ME, E04, E06, E11, E16 & E17 & (UPEN) | RM 150.00     |
| 5.   | MPSepang (KEJ) 400-10/12/06 | CADANGAN KERJA-KERJA PENGGANTIAN KABEL BAWAH TANAH DAN LAMPU AWAM DI JALAN DAHLIA PERWIRA, TAMAN DAHLIA, BANDAR BARU SALAK TINGGI UNTUK MAJLIS PERBANDARAN SEPANG PADA TAHUN 2019   | CIDB, SPKK,G3 ATAU G4 ME, E04, E06, E11, E16 & E17 & (UPEN)  | RM 150.00     |
| 6.   | MPSepang (KEJ) 400-10/12/07 | CADANGAN KERJA-KERJA PENGGANTIAN KABEL BAWAH TANAH SERTA KERJA-KERJA YANG BERKAITAN DI JALAN PUTRA PERDANA 9, JALAN PUTRA PERDANA 10 DAN JALAN PUTRA PERDANA 11, TAMAN PUTRA PERDANA, PUCHONG UNTUK MAJLIS PERBANDARAN SEPANG PADA TAHUN 2019 | CIDB, SPKK,G3 ATAU G4 ME, E04, E06, E11, E16 & E17 & (UPEN)  | RM 150.00     |

1. Tender adalah dipelawa daripada kontraktor – kontraktor yang berdaftar dengan CIDB dan Unit Perancang Ekonomi Negeri (UPEN) bagi kerja – kerja berikut:

| BIL. | NO. TENDER                  | TAJUK KERJA   | BIDANG, SUB BIDANG & PECAHAN BIDANG                  | HARGA DOKUMEN |
|------|-----------------------------|---|--|---------------|
| 7.   | MPSepang (KEJ) 400-10/12/08 | CADANGAN KERJA-KERJA PENGGANTIAN KABEL BAWAH TANAH SERTA KERJA-KERJA YANG BERKAITAN DI JALAN PERSIARAN DPP UTAMA, JALAN PERSIARAN DPP 1, JALAN PERSIARAN DPP 5, JALAN PP 2/1, JALAN PP 3/10, JALAN PINGGIRAN PUTRA 4, JALAN 4A, JALAN PP 4/1, JALAN PP 5/35, DESA PINGGIRAN PUTRA UNTUK MAJLIS PERBANDARAN SEPANG PADA TAHUN 2019 | CIDB, SPKK, G4 ME, E04, E06, E11, E16 & E17 & (UPEN) | RM 300.00     |

2. Dokumen tender boleh dibeli pada waktu pejabat di Tingkat 3, Unit Tender Dan Kontrak. Dokumen tender akan dikeluarkan mulai dari tarikh 18hb Mac 2019 hingga 08hb April 2019 dengan harga yang ditetapkan bagi senaskah (tidak dikembalikan). Dokumen Tender hanya dijual kepada kontraktor-kontraktor Bumiputera atau wakil yang mengemukakan Surat Lantikan Wakil, Sijil Pendaftaran Lembaga Pembangunan Industri Pembinaan Malaysia (CIDB) dan Unit Perancang Ekonomi Negeri Selangor (UPEN) yang asal. Bayaran hendaklah dibuat secara Tunai, Wang Pos Atau Bank Draft yang berpalang atas nama 'Yang Dipertua Majlis Perbandaran Sepang'.

3. Dokumen Tender yang telah lengkap diisi hendaklah dihantar dalam sampul surat bermeteri dengan menulis No. Tender disebelah sudut kiri sampul dan dimasukkan ke dalam peti tender di Ruang Lobi Utama, Aras Dua, Majlis Perbandaran Sepang, Cyberjaya, Selangor Darul Ehsan sebelum atau pada jam 12.00 Tengahari pada 08hb April 2019.

4. Majlis Perbandaran Sepang tidak terikat untuk menerima tender yang terendah atau memberi apa – apa sebab tender itu ditolak dan juga tidak bertanggungjawab ke atas sebarang kos perbelanjaan berhubung dengan tender ini dan sebarang keputusan adalah muktamad.



Mahabbah Cycling 2019 kutip lebih RM700,000

## RMS cemar duli sertai kayuhan amal

OLEH NORHAYATI UMOR

**KLANG** - Duli Yang Teramat Mulia Raja Muda Selangor, Tengku Amir Shah ibni Sultan Sharafuddin Idris Shah, berkenan mencemar duli menyertai program kayuhan amal Mahabbah Cycling 2019 anjuran Yayasan Islam Darul Ehsan (YIDE) dan Lembaga Zakat Selangor (LZS), pada 16 Mac lalu.

Baginda bersama peserta terdiri daripada anggota kelab berbasikal dan orang awam berkayuh sejauh 12 kilometer, kira-kira jam 9 pagi bermula dari Masjid Al-Islah, Kampung Sementa, di sini.

Baginda turut berkenan menyampaikan bantuan perubatan dan barang keperluan harian sumbangan daripada LZS kepada dua keluarga asnaf, di Klang.

Sementara itu, Ahli Lembaga Pemegang Amanah YIDE, Datuk Bakhtiar Hussin berkata, sejumlah

RM742,000 dana berjaya dikumpul bagi membantu pesakit buah pinggang melalui program itu.

Katanya, program kayuhan sejauh 12 kilometer itu diadakan sempena Hari Buah Pinggang Sedunia yang disambut, pada Mac setiap tahun.

"Kayuhan amal berkenaan turut berjaya menarik 500 penyertaan termasuk peserta dalam kalangan pesakit buah pinggang.

"Objektif program ini ialah untuk mengumpul dana bagi membantu pembelian mesin hemodialisis yang baharu di Pusat Hemodialisis Majlis Agama Islam Selangor (MAIS) yang sering mengalami kerosakan.

"Semua dana itu hasil sumbangan LZS dan syarikat korporat," katanya.

Bakhtiar berkata, sebanyak 48 mesin hemodialisis dan empat mesin air suling sedia ada di enam cawangan Pusat Dialisis MAIS perlu ditukar kerana digu-



nakan, lebih 10 tahun.

"Semua mesin itu mampu dimanfaat sehingga 270 pesakit keseluruhannya dan penukaran

mesin itu mampu mempertingkatkan proses rawatan kepada pesakit buah pinggang," katanya.

Hadir menyertai program ber-

kenaan, Ahli Dewan Negeri Sementa, Dr Daroyah Alwi dan Ketua Pegawai Penyelaras LZS, Abdul Bathir Hamid.



Amri Yahya dan Taylor Regan melayan peminat

## Sesi ramah mesra pemain Red Giants meriah

**SABAK BERNAM** - Program *Meet and Greet* bersama pemain bola sepak Selangor di perkarangan Stadium Sungai Besar, di sini, pada 16 Mac lalu, mendapat sambutan baik warga Sabak Bernam.

Program di bawah Jelajah 360° Smart Selangor itu membawakan dua pemain Red Giants, iaitu Amri Yahya dan Taylor Regan.

Selain beramah mesra, pengunjung juga berpeluang menimba bolang di hadapan

kedua-dua pemain itu dan bergambar serta mendapatkan tandatangan mereka.

Sementara itu, Amri berkata, program terbabit perlu dianjurkan lagi pada masa akan datang kerana dapat mengeratkan silaturahim antara pemain dan peminat.

"Ramai yang datang program ini. Saya harap ia akan diteruskan pada masa akan datang ke-



rana dapat menggerakkan silaturahim bersama penduduk," katanya.

Jelajah 360° Smart Selangor adalah inisiatif Pemerbadanan Menteri Besar Selangor bertujuan mendokong aspirasi Kerajaan Negeri menjadi Smart State.

## Suntik semangat Selangor baiki kedudukan

**SUNGAI BESAR** - Sokongan padu penyokong terhadap pasukan Selangor diperlukan bagi membantu Red Giants memperbaiki kedudukan dalam Liga Super 2019, pada April nanti.

Pemain Selangor, Amri Yahyah berkata, beliau dan rakan sepasukan lebih bersedia mengharungi perlawanan selepas tamat tempoh liga berehat, selama dua minggu.

"Saya juga berharap pemain akan lebih bersedia selepas mendapat masa rehat selama dua minggu ini dan meningkatkan kerjasama lebih tinggi.

"Saya dan pasukan akan sedaya upaya memperbaiki kedudukan dengan kerjasama pihak pengurusan dan harap akan dapat memberikan tentangan sengit dalam perlawanan akan datang," ka-

tanya.

Beliau berkata demikian kepada media selepas menghadiri segmen *Meet and Greet* Persatuan Bola Sepak Selangor Bersama Taylor Regan & Amri Yahyah, di program Jelajah 360 Smart Selangor "Alami Smart Selangor" di Stadium Sungai Besar, di sini, pada 16 Mac lalu.

Amri berkata, sokongan padu penyokong mampu menjadi tonik terbaik untuk pemain memberi aksi terbaik masing-masing.

"Kepada penyokong, teruslah menyokong pasukan Selangor walaupun apa terjadi. Kami akan berusaha bersungguh-sungguh meletakkan pasukan ini di kedudukan terbaik," katanya.

